

# Enyaarubha yo okutaanga ya Pauro ku Bhakoriinto Obhutaangiro

Enyaarubha yino yakaamirwe na Pauro, omweega wa Krisito Yeesu na Sositene. Bhakakaama enyaarubha yino kukanisa yino Pauro akataanga mumugye gwa Koriinto. Omugye gwa Koriinto gwaari kurung'oongo rwe enyaanza ya Mediteraniani. Abhaatu bhaaru okurwa mbaara zyoosi bhaari bharagurya ebhigiro bhyaaru mumugye guyo. Abhaatu bhayo bhaari ne eziinyaangi zya tuubho nzaru, kwo okusabha no okuseengera emisaambwa gyo okubhaazwa. Eziinyaangi ziyo zikakora Abhakrisito bhakatubhuuzikana mubhwiikirirya bhwaabhu no okumubhuurya Pauro amabhuuryo.

Pauro akiikara Koriinto kwa mwaaka gumwe, yaari areegya abhaatu bhaaru iguru wa Yeesu na abhaaru bhaari bhiikiriirye. Nawe hano yaari atanwiiri, akabhona amang'ana iguru wa Abhakrisito eyo. Akabhuurirwa kubha no obhutwaanikani bhwa amakanisa, bhyaari bhiriho ebhibhi bhyo obhuseebheeti, obhutuungiri na amabhuuryo iguru wa amang'ana go obhukweererani.

Munyaarubha yino, Pauro arabharagirirya iguru wa abhaatu bhakweenderwa okukora mukanisa eribhaga rye ebhyaakurya na

amasabhi. Iguru ya gayo, Pauro areegya iguru wo obhuturo bhwe Ekoru Muhoreeru, obhumwe bhwa Abhakrisito mu Koro no obhuryooki bhwa abhaku. Mubhuteero, arabhaha amaragiriryo iguru wo obhusakiribhwa kubhiikirirya bha Yerusaremu.

### *Obhukeerya bhwa Pauro ku Bhakoriinto*

<sup>1</sup> Enyaarubha yino nikaamiri enye Pauro, omweega wa Krisito Yeesu kwo obhuseegi bhwa Taatabhugya, hamwe na Sositenesi, omwiikirirya omurikyeetu.

<sup>2</sup> Nirabhakaamira emwe bhano muri mukanisa ya Taatabhugya mumugye gwa Koriinto. Taatabhugya abheerirye no okubhasora mugwaatane na Krisito Yeesu, na abhabhirikiiri kubha abhahoreeru\* bhaaye, hamwe na neemwe mwoosi bhe eziimbaara zyoosi bhano bhakumusabha Yeesu Krisito. Wuno niwe Omukuru waabhu no Omukuru weetu twoosi.

<sup>3</sup> Orubhaango no omureembe okurwa ku Taatabhugya Taata weetu, na ku Mukuru Yeesu Krisito, bhibhe neemwe.

### *Pauro aramubhuurira Taatabhugya “Ozomirye”*

<sup>4</sup> Niramubhuurira, “Ozomirye, Taatabhugya,” eriibhaga ryoosi kwiiguru weenyu, kwe ekigirirye kyo orubhaango runo abhaheeri kwe enzira ya Krisito Yeesu.

<sup>5</sup> Kwo okugwaatana kweemwe na Krisito, muniibhiri mumang’ana goosi, kiindi kwo

---

\* **1:2 Abhahoreeru.** Rora eng’ana yino mu Bhugaruri bhwa Amang’ana Amakong’u.

obhugaambi bhweenyu na  
mubhumenyeekererya bhweenyu.

<sup>6</sup> Gayo gareerekya kubha amang'ana gano  
twabharwaaziiri iguru wa Krisito ni ge eheene.

<sup>7</sup> Bhoono mutakusuuhirwa naabhe obhuturo  
bhumwe bhwe Ekoru Muhoreeru,† mukubha  
muraganya kwe enaamba kuru okukyoora kwo  
Omukuru weetu Yeesu Krisito.

<sup>8</sup> Ewe niwe akubhagumirya tee mubhuteero  
okubha mutaaza kubha na amasoro, orusiku  
runo Omukuru weetu Yeesu Krisito araaze  
okutinira ekiina abhaatu.

<sup>9</sup> Taatabhugya arakuunaanania gayo kwo okubha  
ewe ni muheene. Ewe niwe akabhabhirikira  
emwe, mubhe no obhugwaatani no Omwaana  
waaye Yeesu Krisito, Omukuru weetu.

### *Obhumwe gati wa abhiikirirya*

<sup>10</sup> Bhoono, abhahiiri bhaane, nirabhiisasaama  
kwe eriina ryo Omukuru weetu Yeesu Krisito  
kubha, mutatwaanikana mumakeerenio.  
Bhutabhaho obhutwaanikano gati weenyu,  
nawe mubhe no obhumwe mugano mukwiisiga  
na mugano mukwiiseega.

<sup>11</sup> Abhahiiri bhaane, abhaatu abharebhe bha  
mumugye gwa Koroe bhanibhuuriiri kubha  
rireho eriyyoge gati weenyu.

<sup>12</sup> Bhoono, gano nigo nikweenda okugaamba,  
omuutu wuyo woosi gati weenyu aragaamba  
gaaye. Owumwe arabhuga, “Enye ni wa Pauro.”  
Owuundi arabhuga, “Enye ni wa Apooro.”

---

† **1:7 Ekoru Muhoreeru.** Rora amang'ana gano mu Bhugaruri  
bhwa Amang'ana Amakong'u.

Owuundi arabhuga, “Enye ni wa Kefa.”‡  
 Owuundi arabhuga, “Enye ni wa Krisito.”

13 Mbe, Krisito atwaanikeeni? Mbe, Pauro niwe akakwa kumusaraba kwiiguru weenyu? Mbe, mukabatiizwa kwe eriina rya Pauro?

14 Nirabhuga, “Ozomirye, Taatabhugya,” kwe ekigirirye nitamubatiiziri omuutu wowoosi gati weenyu, nawe Kirisipo na Gaayo.

15 Kweego, atariho wuno akunagya kugaamba kubha, abatiizirwe kwe eriina ryaane.

16 Nirahiita kubha, nikabatiiza kweeki abhaatu bhe enyuumba ya Sitefana. Nawe kukira bhayo, nitamenyiri eraabhe niamubatiiziri omuutu owuundi wowoosi.

17 Krisito§ ataanitumiri enye okubatiiza abhaatu. Akaanituma okurwaaza Amang’ana Amazomu, kutama okwiisiga amang’eeni gaane go okugaamba bhuzomu, okubha oruku rwa Krisito kumusaraba rutabhura amanaga gaaye.

### *Krisito niwe amanaga na amang’eeni ga Taatabhugya*

18 Abhaatu bhano bhakubhura bhararora kubha amang’ana go okukwa Krisito kumusaraba ni ga bhweene ego, nawe kweetwe bhano tukutuuribhwa, amang’ana gayo gareerekya amanaga ga Taatabhugya.

---

‡ **1:12 Kefa**, eriina ryaaye eriindi arabhirikirwa *Petero*. Eriina Petero ni mukigaambo kye Ekiyunaani, ne eriina rino Kefa ni mukigaambo kye Kiaramu. Mubhigaambo bhino obhugazuro bhwaku ni *riitare*. § **1:17 Krisito** ni ng’ana ye Ekiyunaani, obhugazuro bhwaku ni *wuno ahakirwe amaguta*. Mu Kieburania bharabhuga *Masiya*. Rora eng’ana yino mu Bhugaruri bhwa Amang’ana Amakong’u.

19 Ni kyeego ekaamirwe mu Makaamo Amahoreeru,  
 “Abhaatu bha amang’eeni nirasarya amang’eeni gaabhu.

Abhang’eeni nirabhurya amang’eeni gaabhu.”\*

20 Bhoono bharihe bhano bhakwiiseega bhana amang’eeni? Bhari hayi bhano bhakwiigaamba ni bheegya bhe emigiro gya Musa, naabhe abhaatu bhano bhamenyiri okugaamba bhuzomu eziisiku zino? Taatabhugya yeerekirye kubhweero kubha amang’eeni ge ekyaaro kino ni bhutuumbaahu.

21 Niragaamba ego, kwo okubha Taatabhugya kwa amang’eeni gaaye, akaamura kubha abhaatu bhatakunagya okumumenya kwa amang’eeni gaabhu abheene. Nawe Taatabhugya akaseega kubhatuurya bhano bhakumwiikirirya kwe enzira ya amang’ana gano tukurwaaza. Amang’ana gayo, abhaatu bhe ekyaaro bharabhuga kubha ni ga bhweene ego.

22 Kwa Abhayahudi abheene bhareenda ekyeerekenio okubha bhiikirirye, na Abhayunaani ebho bharamoohya amang’eeni.

23 Nawe etwe, turarwaaza amang’ana iguru wa Krisito wuno akakwa kumusaraba. Amang’ana gayo garabhiihira Abhayahudi, na kubhano bhatari Abhayahudi ni mang’ana ga bhweene ego.

24 Nawe kubhano Taatabhugya yabhabhirikiiri kubha bhaaye, bhabhe Abhayahudi kasi bhabhe Abhayunaani, Krisito niwe amanaga na amang’eeni ga Taatabhugya.

---

\* 1:19 Rora Isaya 29:14.

<sup>25</sup> Amang'ana gano abhaatu bhakurora kubha ni bhutuumbaahu bhwa Taatabhugya, garahita amang'eeni ga abhaatu. Na gano bhakurora kubha ni bhunyookobhu bhwa Taatabhugya, gana amanaga kukira amanaga ga abhaatu.

<sup>26</sup> Bhoono, abhahiiri bhaane, muhiite kyeego mwaari hano mwabhirikiirwe na Taatabhugya. Kwa amiiseego ga abhaatu, abhaaru gati weenyu bhataari na amang'eeni. Kweeki abhaaru gati weenyu mutaari mumenyekeeni bhukong'u, naabhe mutiibhwiirwe mumigye gya abhataake.

<sup>27</sup> Nawe Taatabhugya akagasora amang'ana gano abhaatu bhakurora ni ga bhweene ego, okubha abhasuukye bha amang'eeni. Kweeki Taatabhugya akagasora amang'ana gano abhaatu bhakurora kubha ni bhunyookobhu, okubha abhasuukye bha amanaga.

<sup>28</sup> Kweeki Taatabhugya akagasora amang'ana gano abhaatu bhakurora kubha gatana obhusuuku na gano bhakugazeera, kweeki gano bhakurora kubha gatana obhugazuro, okubha asarye amang'ana gano abhaatu bhakurora kubha gana obhugazuro.

<sup>29</sup> Akakora ego okubha omuutu wowoosi atiikumya embere wa Taatabhugya.

<sup>30</sup> Taatabhugya niwe abhagwaateenie na Krisito Yeesu. Ewe amukoriri Krisito abhe amang'eeni geetu. Kwe enzira ya Yeesu tubheeri bhe eheene embere wa Taatabhugya, tubheeri abhahoreeru na tutuuriibhwe.

<sup>31</sup> Ni kyeego ekaamirwe mu Makaamo Amahoreeru, "Omuutu wuyo woosi wuno

akwiikumya, yikumye kwiiguru wo Omukuru.”†

## 2

### *Okurwaaza amang'ana iguru wa Yeesu Krisito*

<sup>1</sup> Abhahiiri bhaane, hano nikaaza kweemwe okubharwaazira iguru ye embiso ya Taatabhugya yino yaari ebhisirwe,\* nitaagaambiri kwa amang'ana go obhusomi naabhe kwa amang'eeni.

<sup>2</sup> Hano niari kweemwe, nikaamura nigaambe amang'ana iguru wa Yeesu Krisito ego, kiindi okukwa kwaaye kumusaraba, kutama okugaamba kigiro ekiindi.

<sup>3</sup> Eriibhaga riyo niari munyookobhu, niari ne ehaho, no okurigita bhukong'u.

<sup>4</sup> Hano niari nikweegya no okurwaaza, nitaagaambiri kwa amang'eeni gaane, okubha nibhakorokoombe abhaatu kwe ekigirirye kya amang'eeni, nawe amanaga ge Ekoru Muhoreeru gaari gareerekya obhuheene.

<sup>5</sup> Nikakora ego, okubha obhwiikirirya bhweenyu bhutiisigira amang'eeni ga abhaatu, nawe bhwiisigire amanaga ga Taatabhugya.

### *Amang'eeni okurwa kwe Ekoru Muhoreeru*

<sup>6</sup> Bhoono etwe, turagaamba amang'ana ga amang'eeni kubhaatu bhano bhakong'iri mubhwiikirirya, nawe amang'eeni gayo gatari ge ekyaarro kino, na gatari ga abhakaangati bhe ekyaarro kino bhano bharaabhure.

† 1:31 Rora Yeremia 9:23-24.

\* 2:1 *Embiso ya Taatabhugya yino yaari ebhisirwe*, amakaamo agaandi ge Ekiyunaani garabhuga, *obhugaambi iguru wa Taatabhugya*.

<sup>7</sup> Amang’eeni gano tukurwaaza ni mbiso ya Taatabhugya, yino yaari ebhisirwe okubha abhaatu bhatayimenya. Hano Taatabhugya yaari akyaari kuteema ekyaaro, akaamura kuhokeerya amang’eeni gayo, okubha atukorere amazomu.

<sup>8</sup> Atariho naabhe owumwe wa abhakaangati bhe ekyaaro kino, wuno yamenyiri amang’eeni gayo, kwo okubha bhaangabheeri bhagamenyiri, bhatiingamutemereeri kumusaraba Omukuru wo obhuguungo.

<sup>9</sup> Ni kyeego ekaamirwe mu Makaamo Amahoreeru kubha,  
 “Gano Taatabhugya abhabhanuriiri bhano  
     bhamuseegiri,  
 atariho omuutu wuno yaakagaruuzi naabhe  
     okugiigwa,  
 atariho omuutu wuno yaakagatuuriri mukoro  
 yaaye.”†

<sup>10</sup> Nawe etwe, Taatabhugya akatweerekya gayo kuhitira kwe Egoro Muhoreeru, kwo okubha Egoro Muhoreeru ariisuunza goosi, naabhe amiiseego ga Taatabhugya gano gabhisirwe.

<sup>11</sup> Atariho omuutu wuno akunagya kumenya gano omuutu owuundi akwiiseega. Nawe egoro yaaye omweene ego egamenyiri. Egoego na gano Taatabhugya akwiiseega, atariho wuno akunagya okugamenya. Nawe Egoro wa Taatabhugya omweene agamenyiri.

<sup>12</sup> Taatabhugya atuheeri etwe Egoro yaaye, okubha tugamenye gano tuheerwe kwo orubhaango rwa Taatabhugya. Kweego

---

† 2:9 Rora Isaya 64:4.

tutakwiiseega kyeego abhaatu bhe ekyaaro bhakwiiseega.

<sup>13</sup> Kweeki tutakugaamba amang’ana gano tweegiibhwe na amang’eeni ga abhaatu, nawe amang’ana gano tweegiibhwe ne Ekoru wa Taatabhugya. Turagagarura amang’ana ge Ekoru wa Taatabhugya kubhano bhane Ekoru wuyo.‡

<sup>14</sup> Nawe omuutu wuno atana Ekoru wa Taatabhugya, atakusuung’aana gano gakurwa kwe Ekoru wa Taatabhugya, kwe ekigirirye kweewe gayo ni ga bhweene ego. Kweeki atakunagya kugamenya, kwe ekigirirye garamenyekana ageene kwo obhusakirya bhwe Ekoru wa Taatabhugya.

<sup>15</sup> Omuutu wuno akukaangatwa ne Ekoru wa Taatabhugya aragamanya goosi, nawe ewe, atakunagya kumenyekana no omuutu wuyo woosi.

<sup>16</sup> Ni kyeego Amakaamo Amahoreeru gakubhuga,

“Ni weewi wuno amenyiri gano Omukuru,  
Taatabhugya akwiiseega?

Kweeki ni weewi wuno akunagya  
kumutoongera?”§

Nawe, etwe turiiseega amang’ana kya gano Krisito akwiiseega.

### 3

#### *Obhumwe mumirimo gya Taatabhugya*

‡ **2:13** *Kubhano bhane Ekoru wuyo*, obhugazuro obhuundi bhuratura kubha, *kumang’ana ge ekoro*. § **2:16** Rora Isaya 40:13.

<sup>1</sup> Abhahiiri bhaane, hano niari kweemwe nitaari niragaamba na neemwe kya abhaatu bhano bhakukaangatibhwa ne Ekoru Muhoreeru. Nawe niari niragaamba na neemwe kya abhaatu bhano bhakukaangatibhwa na amang'ana ge ekyaaro, kweeki kyeego abhaana abharere kwo okumwiikirirya Krisito.

<sup>2</sup> Abhaana abharere bharanywa amabheere ageene, bhatakuhaabhwa ebhyaakurya kya abhaatu abhakuru. Egoego enye nikabhaha ameeogyo amahuhu kwe ekigirirye mwaari mukyaari kukong'a. Naabhe bhoono mukyaari kukong'a,

<sup>3</sup> kwo okubha mukyaari murakaangatibhwa na amang'ana ge ekyaaro. Gati weenyu bhariho bho omugono ne eriiyoge, bhireerekya kubha mukyaari murakaangatibhwa na amang'ana ge ekyaaro no okwiikara kya abhaatu bhe ekyaaro.

<sup>4</sup> Niragaamba ego kwo okubha omuutu wuyo woosi aragaamba agaaye, owumwe arabhuga, "Enye ni wa Pauro," owuundi arabhuga, "Enye ni wa Apooro." Bhoono gayo gareerekya, mukyaari murakora kya abhaatu bhe ekyaaro.

<sup>5</sup> Ambe bhoono, Apooro ni weewi? Na Pauro ni weewi? Etwe twoosi ni bhahokya bhano Taatabhugya yatutumiri okubhasakirya emwe mumwiikirirye. Omuutu wowoosi arakora emirimo gino yaheerwe no Omukuru.

<sup>6</sup> Enye nikeemya eziimbibho, Apooro akiitirira, nawe Taatabhugya niwe yamerirye no okukurya.

<sup>7</sup> Kweego, wuno akweemya eziimbibho etari kigiro, naabhe wuno akwiitirira, nawe Taatabhugya wuno akukurya niwe wo

okwiisigira.

<sup>8</sup> Wuno akweemya na wuno akwiitirira bhoosi bhari kisi, Taatabhugya aramuha esaambo yaaye, okuriing'aana na kyeego yakoriri emirimo gyaaye.

<sup>9</sup> Niragaamba ego, kwo okubha emirimo gino tukukora enye na Apooro ni gya Taatabhugya, na neemwe ni muguundu gwaaye, kweeki emwe ni nyuumba yaaye.

<sup>10</sup> Taatabhugya kwo orubhaango rwaaye anisakiirye okwoomboka obhurusa kyeego omwoomboki omuzomu wa amang'eeni, no omuutu owuundi aroomboka iguru yo obhurusa bhuyo. Nawe bhoono, omuutu wowoosi arore bhuzomu, kyeego aroomboke iguru yo obhurusa bhuyo.

<sup>11</sup> Akore ego, kwo okubha obhurusa bhuno bhumariri okwoombokwa ni Yeesu Krisito omweene. Kweego, atariho omuutu wuno akunagya okwoomboka obhurusa obhuundi.

<sup>12</sup> Iguru yo obhurusa bhuyo, omuutu aranagya okwoomboka kwe ezahaabu, kwe eziimbirya, kasi kwa amagina go obhuguri bhukuru, kwe emiti, kwa amanyaaki, kasi kwa amatu,

<sup>13</sup> no obhweera bhwe emirimo gyo omuutu wuyo woosi bhurarorekana kubhweero. Orusiku rurya rwo okutina ekiina, emirimo gyoosi girarorekana kubhweero, kwo okubha emirimo gyo omuutu, girarengibhwa kwo omuriro gwo okutina ekiina.

<sup>14</sup> Eraabhe emirimo gyo omuutu gino yakoriri girageenderera kubhaho, arasuung'aana esaambo.

15 Eraabhe emirimo gyo omuutu wuyo gisikiri, hayo arabhurya esaambo, nawe ewe omweene araturibhwa, yiingabha arabha kyo omuutu wuno ahoneeri rwo okwaagura okusikira mumuriro gwo obhutini bhwe ekiina.

16 Mbe, mutamenyiri kubha emwe ni iseengerero rya Taatabhugya, kweeki Ekoru wa Taatabhugya ariikara muusi weenyu?

17 Eraabhe omuutu arasarya eriiseengerero rya Taatabhugya, Taatabhugya aramusarya omuutu wuyo, kwe ekigirirye eriiseengerero rya Taatabhugya ni horeeru, ne eriiseengerero riyo niryo emwe.

18 Omuutu wowoosi gati weenyu atiikaangirirya ana amang'eeni. Eraabhe omuutu akwiirora kubha ana amang'eeni mukyaaro kino, abhe ariikora mugeege okubha abhone amang'eeni ge eheene.

19 Akore ego, kwo okubha amang'eeni ge ekyaaro kino, ni ga bhweene ego embere wa Taatabhugya. Ni kyeego ekaamirwe mu Makaamo Amahoreeru kubha, "Taatabhugya arabhagwaata bha amang'eeni muniku yaabhu."\*

20 Kweeki ekaamirwe mu Makaamo Amahoreeru kubha, "Omukuru amenyiri amiiseego ga abhang'eeni, gatana bhweera."†

21 Bhoono, omuutu wowoosi atiikumya kwo okubha ewe ni mwiikirirya wo omuutu omurebhe, kwo okubha Taatabhugya atutuuriri etwe twoosi tubhasakirye emwe,

---

\* 3:19 Rora Ayubu 5:13. † 3:20 Rora Zaburi 94:11.

<sup>22</sup> ebhe enye Pauro, abhe Apooro, kasi Kefa. Kweeki Taatabhugya abhaheeri ebhigiro bhyoosi okubhasakirya, bhibhe bhya mukyaaro, kasi obhuhoru, kasi oruku, bhibhe bhireho bhoono, kasi bhiraabheho, bhyoosi ni bhyeenyu.

<sup>23</sup> Nawe emwe, ni bha Krisito, neewe Krisito ni wa Taatabhugya.

## 4

### *Emirimo gya abheega*

<sup>1</sup> Abhaatu bhatubhare etwe kubha ni bhabhagati bha Krisito, tuheerwe emirimo gyo okwiimeererera amang'ana ge embiso ya Taatabhugya.

<sup>2</sup> Bhoono, omuutu wuno aheerwe emirimo, areenderwa abhe omuhokya omuheene.

<sup>3</sup> Nawe kweenye, etari kigiro niraatinirwe ekiina neemwe, eraabhe niraatinirwe ekiina na abhatini bhe ekiina mukiina. Naabhe enye omweene nitakutura okwiitinira ekiina,

<sup>4</sup> kwo okubha nitakurora ryoryoosi eriibhiihu mukoro yaane. Nawe riyo ritakugirya nitabha ni isarya. Omukuru Yeesu niwe akunitinira ekiina.

<sup>5</sup> Bhoono, mutatinira ekiina abhaatu eriibhaga ryaabhu rikyaari kuhika, muganye tee orusiku runo Omukuru Yeesu araaze. Ewe niwe araarore ebhigiro bhyoosi bhino bhibhisirwe mukiirima no okweerekya gano gari muziikoro zya abhaatu. Niho omuutu akubhona omukumo guno akweenderwa, okurwa ku Taatabhugya.

<sup>6</sup> Abhahiiri bhaane, nigaambiri amang'ana gayo goosi iguru waane na Apooro, okubha tubhe ekireengyo kwiiguru weenyu.

Okutuukana kwe ekireengyo kiyo, mumenye gano gakugaambwa mubhugaambi bhuno, “Mutiitaambuka gano gakaamirwe mu Makaamo Amahoreeru.” Eraabhe muratuniirira obhugaambi bhuyo, atakubhaho omuutu wowoosi wuno akumukumya omuutu owumwe no okumuzeera owuundi.

<sup>7</sup> Bhoono, ni weewi wuno akukoriri obhe omukuru kukira owuundi? Ni kigiroki kino onakyo kino otaheerwe na Taatabhugya? Eraabhe oheerwe, kwaki oriikumya kyamuna otaheerwe?

<sup>8</sup> Bhoono muriirora mwiigutiri! Muriirora muniibhiri! Muriirora abhatemi kukira etwe! Hakiriku muungabheeri abhatemi eheene, okubha etwe tubhaahe hamwe neemwe!

<sup>9</sup> Nawe, niriiseega Taatabhugya atukoriri etwe abheega kubha abhaatu bho okuzeerwa kukira bhoosi. Tubheeri kya abhaatu bhano bhatiniirwe ekiina okwiitwa. Tutuurirwe kya abhaatu bho okusekwa mukyaaro, kubhamaraika\* na kubhaatu.

<sup>10</sup> Abhaatu bhaaru bharaturora etwe bhatuumbaahu, kwo okubha turamuhokeerya Krisito, nawe emwe muriirora bha amang’eeni kwo okubha muramutuniirira Krisito. Etwe turarorekana kubha bhanyookobhu, nawe emwe muriirora muna amanaga. Etwe turazeerwa, nawe emwe muriirora abhasuukwa.

<sup>11</sup> Tee bhoono, tune enzara ne enyoota, na tutana eziingibho zyo okwiisa, turatemwa, na tutana ho okwiikara.

---

\* **4:9 Bhamaraika.** Rora eng’ana *maraiika* mu Bhugaruri bhwa Amang’ana Amakong’u.

12 Turakora emirimo gyeetu kwo omukya na kwa amabhoko geetu abheene. Hano abhaatu bhakututuka, turabhatweera ebhite. Hano bhakutunyaakya, turiikong'eererya.

13 Hano bhakutugaamba bhubhi, tukabhakyoora kwo okubhiisasaama. Naabhe, turarorwa kyo obhunyakya bhwe ekyaaro, na tutakweenderwa kwa ryoryoosi.

14 Nitakubhakaamira amang'ana gano kubhasuukya, nawe ndeenda okubharekya kya abhaana bhaane abhasegwa,

15 kwo okubha yiatingaba muna abhaatu ebhikwe ikumi (10,000) bhano bhakubharera mubhwiikari bhweenyu bhwe Ekikrisito, wuuso weenyu ni wumwe. Enye ni wuuso weenyu ku Krisito Yeesu, kwo okubha enye niwe niabharwaaziiri Amang'ana Amazomu.

16 Bhoono, nirabhiisasaama kubha, mubhe muratuniirira ekireengyo kyaane.

17 Riyo niryo rigirye nimutumeenie Timoteo, omwaana waane omusegwa, omuheene mumirimo gyo Omukuru. Ewe arabhahiitya gano enye nikugatuniirira kwo okugwaatana na Krisito, gano nikweegya abhaatu ahagiroyo hayo hoosi mumakanisa goosi.

18 Bhoono abhaandi gati weenyu bhariizuungya, kwo okubha bhariiseega nitakuuza kweeki kweemwe.

19 Nawe Omukuru araaseege, niraaza kweemwe bhwaangu. Hayo niho niraamenye amang'ana gano bhakugaamba bhano bhakwiizuungya, ne etari okumenya amang'ana

gayo ageene, nawe okumenya naabhe eziinguru zyaabhu.

<sup>20</sup> Niragaamba ego kwo okubha obhutemi bhwa Taatabhugya,† bhutakurorekana mumang'ana ageene, kiindi muziinguru zyaabhu.

<sup>21</sup> Bhoono, mureenda nikorebhwi? Mbe, niize kweemwe ne ehiimbo okubha nibhateme? Kasi niize kwo obhuseegi no obhunyoohu?

## 5

### *Obhuseebheeti bhutakweenderwa gati wa abhiikirirya*

<sup>1</sup> Eheene amang'ana gigwiirwe kubha, gati weenyu bhuriho obhuseebheeti. Obhuseebheeti kya bhuyo, bhutaakarorekeeni naabhe kubhaatu bhano bhatamumenyiri Taatabhugya. Ni bhuseebheeti bhwo omuutu kugeenda no omukari wa wiise waabhu.

<sup>2</sup> Kwaki emwe muriizuungya? Hakiriku muungabheeri ne ebhigoongi no okumuruusyaho omuutu wuno akukora gayo gati weenyu!

<sup>3</sup> Niragaamba ego, kwe ekigirirye kyo okubha hamwe neemwe mukoro, yiingabha nitari hamwe neemwe kwo omubhiri, na nimariri okumutinira ekiina omuutu wuyo. Riyo niryo niingakoriri, hano niingabheeri eyo.

<sup>4</sup> Hano mukwiikumania kuriina ryo Omukuru weetu Yeesu, enye nirabha hamwe neemwe kwe

---

† **4:20** *Obhutemi bhwa Taatabhugya* ni hagiyo hayo hoosi hano Taatabhugya niwe omukaangati. Rora amang'ana gano mu Bhugaruri bhwa Amang'ana Amakong'u.

ekoro, no obhunagya bhwo Omukuru weetu Yeesu, bhurabha hamwe neemwe.

<sup>5</sup> Mumuruusyeho omuutu wuyo gati weenyu no okumutiga mubhukaangati bhwa Seetaani,\* okubha esimuka ye ebhibhi esikibhwe, nawe ewe omweene atuuribhwe orusiku rwo okukyoora kwo Omukuru Yeesu.

<sup>6</sup> Obhwiizuungya bhweenyu bhutakweenderwa. Mutamenyiri kubha, ekibhwiisya kisuuu kiratuunduurya obhutu bhwoosi?

<sup>7</sup> Kweego, mubhe muriyeerya, kwe enzira yo okumuruusyaho omuutu wuyo omubhi gati weenyu, kyeego okuruusya ekibhwiisya† kye ekare. Hayo murabha abhaatu bhahya, ni kyo obhutu obhuhya bhuno bhutana ekibhwiisya. Ego niigo muri, kwo okubha Krisito, eng'oondu‡ weetu we Enyaangi yo Okuhiita, amariri kuruusibhwa kubha ekimweeso okubha otutuurye.§

<sup>8</sup> Bhoono, tutakora Enyaangi yo Okuhiita, okubha kwo obhubhi ne ebhibhi, nawe tukore kwe emikaate gino gitana ekibhwiisya,\* niigo kwe ekoro enzomu ne eheene.

---

\* **5:5 Seetaani.** Rora eng'ana yino mu Bhugaruri bhwa Amang'ana Amakong'u. † **5:7** Ku Nyaangi yo Okuhiita bhahaarya emikaate gino gitana **ekibhwiisya.** Kubhaatu bha Taatabhugya, ebhibhi ni kye ekibhwiisya. Rora *Enyaangi yo Okuhiita* mu Bhugaruri bhwa Amang'ana Amakong'u. ‡ **5:7 Eng'oondu.** Rora eng'ana yino mu Bhugaruri bhwa Amang'ana Amakong'u. § **5:7** Pauro aramutuubhania Yeesu ne eyimwe ye eziing'oondu ziyo, kwo okubha okuhitira amanyiinga ga Yeesu, Taatabhugya atutuuriye. Rora Okurwa 12:21-23. \* **5:8** Rora Okurwa 12:3-20; Obhuhiiti bhwe Emigiro 16:3.

<sup>9</sup> Munyaarubha yino niabhakaamiiri, nikabhabhuurira, mutagwaatana na abhaseebheeti.

<sup>10</sup> Obhugazuro bhwaane bhutari kubha, mutagwaatana na abhaseebheeti, abhiimani, abhateesya, naabhe bhano bhakuseengera emisaambwa, eno bhatari abhiikirirya. Niingagaambiri ego, muungang'ariiri okureka mukyaaro hano.

<sup>11</sup> Nawe, kino niagaambiri ni kubha, mutagwaatana no omuutu wuno akwiibhirikira omwiikirirya, eno ni museebheeti, mwiimani, omuseengeri we emisaambwa, omugwaatana, omunywi omuraara kasi omuteesya. Omuutu kya wuyo, mutige naabhe kurya nawe.

<sup>12-13</sup> Ambe bhoono, gitari emirimo gyaane okutinira ekiina bhano bhatari abhiikirirya. Bhayo Taatabhugya omweene niwe araabhatinire ekiina. Nawe emwe mung'ariiri okubhatinira ekiina bhano bhari mukanisa, kyeego ekaamirwe mu Makaamo Amahoreeru, “Omuutu omubhi gati weenyu, mumuheebhe.”†

## 6

### *Amasemo gati wa abhiikirirya*

<sup>1</sup> Eraabhe owumwe gati weenyu ana amasemo iguru yo omwiikirirya omurikyaaye, igabhwi araamura okuhira amasemo gaaye kubhano bhatari abhiikirirya? Nyakara yaangahiriri kubhahoreeru bha Taatabhugya.

† **5:12-13** Rora Obhuhiiti bhwe Emigiro 17:7, 19:19, 22:21, 24, 24:7.

<sup>2</sup> Mutamenyiri kubha, abhahoreeru bha Taatabhugya nibho bharaatinire ekiina ekyaaro kino? Ne eraabhe emwe abhiikirirya muratinira ekiina ekyaaro kino, kwaki mutamwe okutinira ekiina amasemo mahuhu gatigati weenyu?

<sup>3</sup> Mutamenyiri kubha, turabhatinira ekiina naabhe bhamaraika? Eraabhe niigo, ambe, mureenderwa okumara amang'ana eziisiku zyoosi.

<sup>4</sup> Bhoono, hano mukwiiyogenia iguru ya amang'ana eziisiku zyoosi, ndora murahira amasemo geenyu kubhataania bhano bhatakung'arira mukanisa okubha bhatine ekiina?

<sup>5</sup> Niragaamba ego, okubha mureore eziisoni. Awee, gati weenyu atariho naabhe omuutu wumwe wa amang'eeni, wuno akunagya kutina ekiina gati wa abhiikirirya?

<sup>6</sup> Nawe, emwe mune eteemwa yo okumuzoongera omwiikirirya omurikyeenyu mukiina, embere wa bhano bhatari abhiikirirya!

<sup>7</sup> Okwiisema kuyo, kureerekya kubha mutaamiibhwe bhukong'u. Yiingabheeri hakiriku, okutiga omuutu akukora amabhiihu kasi akuteesye ebhigiro bhyaazo.

<sup>8</sup> Nawe bhoono emwe, nibho mukwaangira kukora amabhiihu no okubhateesya abhaatu ebhigiro bhyaabhu, kweeki murakora gayo kubhiikirirya abharikyeenyu!

<sup>9</sup> Mutamenyiri kubha, abhabhi bhatakusikira mubhutemi bhwa Taatabhugya? Mutiikaangirirya! Abhaseebheeti, abhaatu bhano bhakuseengera emisaambwa,

abhatsuungiri, naabhe abhasubhe bhano  
bhakuhiindira na abhasubhe abharikyaabhu,

<sup>10</sup> abhiibhi, abhiimani, abhanywi abharaara,  
abhagwaatania, abhateesya, bhayo bhoosi  
bhatakusikira mubhutemi bhwa Taatabhugya.

<sup>11</sup> Abhaandi gati weenyu bhaari ego. Nawe  
bhoono, kwo okuhitira kwo Omukuru weetu  
Yeesu Krisito, na kwo obhuturo bhwe Ekorwa wa  
Taatabhugya weetu, mwiisaabhiibhwe obhubhi  
bhweenyu, mweeriibhwe no okubharwa bhe  
eheene embere wa Taatabhugya.

### *Abhiikirirya bhaguungye Taatabhugya mumibhiri gyaabhu*

<sup>12</sup> Abhaatu abhaandi gati weenyu bharabhuga,  
“Bhatuheeri orugusa kukora ebhigiro bhyoosi  
kyeego tukweenda.” Nawe enye niragaamba  
kubha, bhitari bhyoosi bhino bhino obhweera.  
Kweeki bharabhuga, “Bhatuheeri orugusa  
kukora ebhigiro bhyoosi kyeego tukweenda.”  
Nawe enye nitakubha omugya wa kyokyoosi.

<sup>13</sup> Abhaandi gati weenyu bharabhuga, “Hano  
tukubha ne enzara tung’ariiri kurya, kwe  
ekigirirye emibhiri gyeetu gireenda  
ebhyaakurya.” Niigo eri, nawe riraaza eriibhaga  
rino Taatabhugya araakyoosye emibhiri gyeetu  
gibhe gitakweenda ebhyaakurya. Mutagaamba  
tung’ariiri kukora obhutuungiri, kyeego  
ekweenderwa okurya hano tukubha ne enzara.  
Niragaamba ego, kwo okubha Taatabhugya  
ataabhuumbiri emibhiri gyeetu kwiiguru yo  
obhuseebheeti, nawe akabhuumba kwiiguru yo

okumuhokeerya Omukuru, neewe Omukuru aragituga emibhiri gyeetu.

<sup>14</sup> Kweeki, Taatabhugya araturyoora etwe kwe eziinguru zyaaye, kyeego akamuryoora Omukuru okurwa muruku.

<sup>15</sup> Mutamenyiri kubha, emibhiri gyeenyu ni bhiimo bhyo omubhiri gwa Krisito? Bhoono, muratura okugwaatania omubhiri gwa Krisito no omubhiri gwo omusiimbe? Zeyi, naabhe hasuuhu!

<sup>16</sup> Mutamenyiri kubha, omuutu wowoosi wuno akugwaatana no omusiimbe, arabha omubhiri gumwe neewe? Ni kyeego ekaamirwe mu Makaamo Amahoreeru kubha, “Abhabhiri bhano, bharabha mubhiri gumwe.”\*

<sup>17</sup> Nawe omuutu wowoosi wuno akugwaatana no Omukuru, arabha egoro eyimwe neewe.

<sup>18</sup> Kweego mwiirihe no obhuseebheeti. Ebbibhi ebhiindi bhyoosi, omuutu arakora igutu yo omubhiri gwaaye, nawe omuutu wuno akuseebheeta, wuyo ariikorera ebhibhi mumubhiri gwaaye omweene.

<sup>19</sup> Mutamenyiri kubha, emibhiri gyeenyu nigyo eriiseengerero rye Egoro Muhoreeru wuno Taatabhugya yabhaheeri, kweeki Egoro Muhoreeru ariikara muusi weenyu? Kweego, emibhiri giyo gitari gyeenyu, nawe ni gya Taatabhugya.

<sup>20</sup> Nikyo kikagirya mukagurwa kwo obhuguri bhukuru. Kweego mumuguungye Taatabhugya mumibhiri gyeenyu.

---

\* **6:16** Rora Obhweemero 2:24.

## 7

*Amaragiriryo iguru yo obhukweeri*

<sup>1</sup> Bhoono niragaamba iguru ya amang’ana gano mwaanikaamiiri. Muragaamba kubha, “Ni bhuzomu omusubhe atige okuhiindira no omukari.”\*

<sup>2</sup> Nawe kwo okubha murakora obhuseebheeti, omusubhe wowoosi abhe no omukari waaye omweene, no omukari wowoosi abhe no omusubhe waaye omweene.

<sup>3</sup> Omusubhe abhe aramukorera omukari waaye kyeego ekweenderwa, no omukari woosi abhe aramukorera omusubhe waaye kyeego ekweenderwa.

<sup>4</sup> Omukari atana obhunagya iguru yo omubhiri gwaaye, nawe omusubhe waaye niwe wo obhunagya iguru yo omubhiri guyo. Neewe omusubhe atana obhunagya iguru yo omubhiri gwaaye, nawe omukari waaye niwe wo obhunagya iguru yo omubhiri gwaaye.

<sup>5</sup> Mutiiyiima, nawe eraabhe mwiikirireenie kukora ego kwiibhaga, okubha mubhone omweeya muzomu gwo okusabha ku Taatabhugya. Ibhaga riindi, mukyoorerane kweeki, okubha Seetaani ataaza kubhasakya kukora obhuseebheeti kwo okubha mutakunagya okwiibhaaha.

<sup>6</sup> Nibhabhuuriiri amang’ana iguru yo okutaana kwiibhaga, nirabhatoongera ego, etari kwo okubhahatika.

---

\* **7:1** Obhugazuro obhuundi bhuratura kubha, *Ni bhuzomu omuutu atakweera.*

<sup>7</sup> Bhoono, niingaseegiri abhaatu bhoosi bhabhe kyeego enye niri,<sup>†</sup> nawe etari ego kwo okubha omuutu wuyo woosi Taatabhugya amuheeri obhuturo bhwaaye, owumwe obhuturo bhuno, owuundi bhurya.

<sup>8</sup> Bhoono, ndabhabhuurira abhaguru na abhatuumba gati weenyu, ni bhuzomu bhageenderere okwiikara ego okutama okukweera kasi okukweerwa, bhabhe kyeego enye niri.

<sup>9</sup> Nawe eraabhe bhakutamwa okwiibhaaha, ni bhuzomu bhakweere kasi okukweerwa, kwo okubha ni hakiriku okukora ego kukira okubha ne enaamba yo omubhiri.

<sup>10</sup> Kubhano bhiikweeriri, nirabhaha obhuswaagyo. Obhuswaagyo bhuyo bhutari bhwaane, nawe bhurwiiri ku Mukuru Yeesu, kubha, omukari atatwaanikana no omusubhe waaye.<sup>‡</sup>

<sup>11</sup> Nawe eraabhe atwaanikeeni neewe, atakweerwa no omusubhe wuundi, hamwe, yiigwaane no omusubhe waaye no okukyoorerana. No omusubhe woosi, atamutiga omukari waaye.

<sup>12</sup> Bhoono niragaamba na abhiikirirya abhaandi. Amang'ana gano nikugaamba ni miiseego gaane, gatari obhuswaagyo bhwo Omukuru Yeesu. Kyo omusubhe omwiikirirya akweeriri omukari wuno atari mwiikirirya, no omukari wuyo yiikiriirye okwiikara neewe, atamutiga.

---

<sup>†</sup> **7:7** Hano Pauro arakeerenia kubha atakweeriri, na bhuyo nibhwo obhuturo bhwaaye. <sup>‡</sup> **7:10** Rora Mataayo 5:32; Mariko 10:9, 12.

<sup>13</sup> Egoego, omukari omwiikirirya, neewe akweerirwe no omusubhe wuno atari mwiikirirya, no omusubhe wuyo yiikirirye okwiikara neewe, atamutiga.

<sup>14</sup> Niragaamba ego, kwo okubha Taatabhugya amwiikiriirye omusubhe wuno atari mwiikirirya, kwe ekigirirye kyo omukari waaye. No omukari wuno atari omwiikirirya, Taatabhugya amwiikiriirye kwe ekigirirye kyo omusubhe waaye. Eraabhe etaangabheeri ego, abhaana bheenyu bhataangabheeri abhahoreeru bha Taatabhugya, nawe bhoono ni bhahoreeru bha Taatabhugya.

<sup>15</sup> Nawe, eraabhe wuno atari mwiikirirya areenda okutaana no omurikyaaye omwiikirirya, mutige akore ego. Hayo omwiikirirya wuyo, atakubhohwa no obhukweeri bhuyo, nawe Taatabhugya atubhirikiiri okubha twiikare kwo omureembe.

<sup>16</sup> Awe omukari omwiikirirya, otakunagya okumenya! Hamwe omusubhe waazo arabhona okumwiikirirya Krisito kwiiguru wo obhwiikirirya bhwaazo. Naawe omusubhe omwiikirirya, otakunagya kumenya! Hamwe omukari waazo arabhona okumwiikirirya Krisito kwiiguru wo obhwiikirirya bhwaazo.

### *Abhiikirirya bhiikare kyeego bhabhirikiirwe na Taatabhugya*

<sup>17</sup> Omuutu wowoosi yiikare kuriing'aana na kyeego Omukuru akumweendera, na kyeego Taatabhugya yamubhirikiiri. Ego niigo nikuswaagya mumakanisa goosi.

18 Eraabhe omuutu yabhirikiirwe na Taatabhugya, eriibhaga yaari asaarirwe, § atiikora kyeego atasaarirwe. Kweeki, eraabhe omuutu akabhirikirwa na Taatabhugya eriibhaga yaari atasaarirwe, atasaarwa.

19 Okusaarwa no okutama kusaarwa bhutariho obhweera. Kigiro kino kino obhweera ni kugwaata obhuswaagyo bhwa Taatabhugya.

20 Bhoono, omuutu wuyo woosi atame kyeego yaari hano Taatabhugya yamubhirikiiri.

21 Eraabhe Taatabhugya yakubhirikiiri hano waari mugya, riyo ritakunyaakya. Nawe eraabhe oraabhone omweeya gwo okwiiragaanza, okorere omweeya guyo.

22 Nibhugiri kubha, riyo ritakunyaakya, kwo okubha omuutu wuno yaari mugya hano yabhirikiirwe no Omukuru, wuyo arabha omwiiragaanzi ku Mukuru. Neewe wuno yabhirikiirwe hano yaari omwiiragaanzi, wuyo ni mugya wa Krisito.

23 Mukagurwa kwo obhuguri bhukuru. Kweego, mutabha abhagya bha abhaatu.

24 Abhahiiri bhaane, omuutu wuyo woosi atame embere wa Taatabhugya, kyeego yaari hano yabhirikiirwe neewe.

### *Amaragiriryo kubhano bhatakweerirwe na kubhatuumba*

---

§ 7:18 **Asaarirwe.** Rora okusaarwa mu Bhugaruri bhwa Amang'ana Amakong'u.

25 Bhoono, kubhaakya bhano bhatakweerirwe,\* nitana eriiswaagyo okurwa ku Mukuru Yeesu. Nawe nirabheerekeererya kwa miiseego gaane, enye wuno nikung'arira okwiikiriribhwa kwe ekigirirye kye ebhigoongi bhya Taatabhugya.

26 Ambe, kwo okubha ziriho eziinyaako nzaru eziisiku zino, niriiseega ni bhuzomu omuutu atame kyeego ari.

27 Eraabhe okweeriri, otatigana na mukaazo. Eraabhe okyaari kukweera, otakweera.

28 Nawe eraabhe oraakweere, otakubha okoriri kibhi. No omuukya neewe, araakweerwe, atakubha akoriri kibhi. Nawe, bhano bhakweereeni bharabha ne eziinyaako mubhwiikari bhwaabhu. Neenye niingaseegiri eziinyaako ziyo zitaaza kubhabhona.

29 Abhahiiri bhaane, ndeenda okugaamba kubha, eribhaga rino risaagiri ni iguhi, tee Krisito akyoore. Kweego, okurwa bhoono bhano bhakweeriri bhatige okwiiseega iguru wa abhakari bhaabhu ego, okubha bhakore emirimo gyo Omukuru.

30 Na bhano bhakurira, bhano bhakuzomererwa, bhano bhakugura ebhigiro,

31 na bhano bhakukorera obhwiikari bhwa mukyaaro kino, bhayo bhoosi bhatanyaakira bhukong'u amang'ana gayo. Bhabhe bharakora emirimo gyo Omukuru, kwo okubha ekyaaaro kino kyeego tukukirora, kirahita.

---

\* 7:25 **Kubhaakya bhano bhatakweerirwe**, obhugazuro obhuundi bhuratura kubha, *kubhano bhakyaari kukweera kasi okukweerwa*.

<sup>32</sup> Ndeenda mutabha no obhwiitiimaati iguru ya amang'ana go obhwiikari bhuno. Omuutu wuno akyaari kukweera, ariinyaakya iguru ye emirimo gyo Omukuru, na ariiseega kyeego araamuzomeerye Omukuru.

<sup>33</sup> Nawe omuutu wuno akweeriri, ahaanyaakira amang'ana go obhwiikari bhwaabhu, akwiiseega kyeego araamuzomeerye omukari waaye,

<sup>34</sup> amiiseego gaaye gari mbaara ibhiri. Omukari kasi omuukya wuno atakweerirwe aramuhokeerya Omukuru, okubha abhe muhoreeru omubhiri ne ekoro. Nawe omukari wuno akweerirwe, ahaanyaakira amang'ana go obhwiikari bhuno, ariiseega kyeego araamuzomeerye omusubhe waaye.

<sup>35</sup> Niragaamba amang'ana gayo kwo obhweera bhweenyu, etari kubha ndeenda kubharekya. Ndeenda mubhe muriikara kyeego ekweenderwa, mubhe muramuhokeerya Omukuru kwe ekoro yoosi.

<sup>36</sup> Omuutu wowoosi wuno akurora kubha etari bhuzomu okutiga kumukweera omuukya wuno amuyuungirye, kweeki eraabhe enaamba yo omubhiri emuhiziri,† omuutu wuyo ararora kubha, ereenderwa bhiikweere, akore kyeego akweenda, bhakweerane. Hayo atakubha akoriri ebhibhi.

<sup>37</sup> Na eraabhe omuutu araamure mukoro yaaye kubha, atakumukweera omuukya wuyo, na

---

† **7:36 Kweeki eraabhe enaamba yo omubhiri emuhiziri**, obhugazuro obhuundi bhuratura kubha, *kweeki naabhe emyaaka gyaaye gyo okukweerwa gihitiri.*

kitariho ekigiro kino kikumuhatika okukweera, kweeki aranagya okubhaaha obhuseegi bhwaaye, ambe, arabha akoriri bhuzomu.

<sup>38</sup> Kweego, wuno akwaamura kumukweera omuukya wuno amuyuungirye, arakora bhuzomu. Na wuno atakumukweera, arakora kisi bhukong'u.‡

<sup>39</sup> Omukari wuno akweerirwe, abhohirwe no obhukweerwa eriibhaga ryoosi rino omusubhe waaye akyaari muhoru. Nawe eraabhe omusubhe waaye akuuri, hayo arabha omwiiragaanzi okukweerwa no omusubhe wowoosi wuno akweenda, nawe omusubhe wuyo abhe omwaanamweega wo Omukuru.

<sup>40</sup> Nawe hakiriku omutuumba wuyo asaage atakweerwa. Gayo ni miiseego gaane, na niriiseega kubha enye woosi Ekoro wa Taatabhugya aranikaangata okugaamba amang'ana gayo.

## 8

### *Ebhyaakurya bhino bhiseengeerwe emisaambwa*

‡ **7:38** Obhugazuro obhuundi bhuratura kubha, *Omuutu wowoosi wuno akurora etari bhuzomu okutiga kumukweerya omuukya wuno ayuungirye, hamwe emyaaka gyaaye gyo okukweerwa gihitiri, no omuutu wuyo ararora kubha, ereenderwa amukweere, akore kyeego akweenda, amukweere. Hayo atakubha akoriri ebhibhi. Na kyo omuutu yamwiiri mukoro yaaye omweene kubha atakumukweerya omuukya waaye, na kitariho kigiro kino kikumuhatika kumukweerya, kweeki aranagya okukaangata obhuseegi bhwaaye, ambe, arabha akoriri kisi. Kweego, omuutu wuno akwaamura kumukweerya omuukya waaye ayuungiibhwe, arakora bhuzomu. Neewe wuno atakumukweerya, arakora kisi.*

*gyo okubhaazwa*

<sup>1</sup> Bhoono niragaamba iguru ye ebhyaakurya bhino bhikuruusibhwa ekimweeso kumisaambwa gyo okubhaazwa.\* Ni heene kubha, “Etwe twoosi tuna amang’eeni.” Nawe amang’eeni garakora abhaatu bhiizuungye. Nawe obhuseegi nibhwo bhukukora bhagumire mubhwiikirirya.

<sup>2</sup> Eraabhe omuutu ariirora kubha amenyiri eriing’ana eriirebhe, wuyo akyaari kumenya ryoryoosi kyeego bhurya akweenderwa kumenya.

<sup>3</sup> Nawe omuutu wuno amuseegiri Taatabhugya, wuyo niwe amenyekeeni na Taatabhugya omweene.

<sup>4</sup> Bhoono iguru yo okurya ebhyaakurya bhino bhikuruusibhwa kumisaambwa gyo okubhaazwa, tumenyiri kubha emisaambwa giyo giraseengerwa, etari kigiro mukyaaro muno. Kweeki tumenyiri kubha ariho Taatabhugya owumwe ego.

<sup>5</sup> Ni heene kubha abhaatu abhaandi bhariiseega kubha kune emisaambwa mwiisaaro naabhe mukyaaro. Eheene, kune ebhigiro bhyaaru bhino abhaatu bhakubhibhirikira kubha emisaambwa kasi abhakaangati.

<sup>6</sup> Nawe kweetwe, ariho Taatabhugya owumwe ego, niwe Taata, niwe Omuteemi we ebhigiro bhyoosi. Etwe turiikara kwiiguru waaye. Kweeki

---

\* **8:1** Muziisiku ziyo, eziinyama nzaru bhaari bhakataanga okutaanga kuseengera kumisaambwa gyo okubhaazwa gino bhaari bhakuseengera kyeego Taatabhugya, kyaamwe ibhaga riindi bhaari bharahira kugurya mumuteera.

ariho Omukuru owumwe ego, niwe Yeesu Krisito, ne ebhigiro bhyoosi bhyaateemirwe kuhitira kweewe, kweeki etwe turi bhahoru kutuukana na neewe.

<sup>7</sup> Nawe etari kubha abhaatu bhoosi bhana amang'eeni gayo, kwe ekigirirye bhariho abhaandi bhano bhaari ne eziinyaangi zyo okuseengera emisaambwa gyo okubhaazwa. Naabhe bhoono, hano bhakurya ebhyaakurya bhino bhikuruusibhwa kumisaambwa gyo okubhaazwa, ebhyaakurya bhiyo bhirabhakora okwiiseega emisaambwa gyo okubhaazwa. Hayo bhariirora mumitima gyaabhu kubha bharakora ebhibhi, kwe ekigirirye bhakyaari kukong'a mubhwiikirirya.

<sup>8</sup> Bhoono, ebhyaakurya bhitakututuura kubha haguhi na Taatabhugya, kwe ekigirirye naabhe tukutiga okurya, tutakubhurya kigiro, kweeki naabhe turaarye, tutakwoongeribhwa kigiro.

<sup>9</sup> Nawe mwiireererere kisi, obhwiiragaanzi bhweenyu bhutabha bhurabhasariirya bhano bhakyaari kukong'a mubhwiikirirya.

<sup>10</sup> Niragaamba ego, kwe ekigirirye omuutu wuno akyaari kukong'a mubhwiikirirya araarore wiikeeri mwiiseengerero rye emisaambwa gyo okubhaazwa orarya, bhoono atakwiiseega mumutima gwaaye kubha neewe areenderwa okurya ebhyaakurya bhino bhikuruusibhwa kumisaambwa gyo okubhaazwa?

<sup>11</sup> Kwe enzira yiyo, omwiikirirya omurikyaaazo wuno akyaari kukong'a mubhwiikirirya, wuno Krisito yamukweereeri, arabhura kutuukana na

amang'eeni gaazo.

<sup>12</sup> Kweego, eraabhe murabhasariirya abhiikirirya abharikyeenyu bhano bhakyaari kukong'a mubhwiikirirya, bhakore gano bhakurora Taatabhugya atakugiikirirya, no okubhanyahaara emitima gyaabhu, hayo murabha muramusariirya Krisito omweene.

<sup>13</sup> Kweego, eraabhe ebhyaakurya bhino nikurya, bhiramugirya omwiikirirya omurikyaane akore ebhibhi, nitakurya kweeki ebhyaakurya bhya tubho yiyo, okubha nitaaza kukora omwiikirirya omurikyaane akore ebhibhi.

## 9

### *Amang'ana gano abheega bhakweenderwa kuhaabhwa*

<sup>1</sup> Bhoono, enye nitari mwiiragaanzi? Enye nitari omweega? Enye nitaamuruuzi Omukuru weetu Yeesu? Kweeki emirimo gino enye niakoriri gitari nigyo gibhakoriri emwe mumwiikirirye Omukuru?

<sup>2</sup> Naabhe eraabhe abhaatu abhaandi bhararora kubha enye nitari omweega, nawe kweemwe enye ni mweega, kwo okubha obhwiikirirya bhweenyu mu Krisito ni rukaamo runo rukweerekya kubha enye nitumirwe no Omukuru.

<sup>3</sup> Abhaatu bhano bhakunihakania enye kubha, nitari omweega, ndabhabhuurira,

<sup>4</sup> etwe tutakweenderwa kuhaanwa bhyo okurya na bhyo okunywa kwiiguru ye emirimo gyeetu gyo obhweega?

<sup>5</sup> Bhoono, muriiseega kubha etwe tutana obhwiiragaanzi kugya na bhamukaabhu abhiikirirya murugeendo rwo okuraarika amang'ana iguru wa Krisito, kyeego bhurya abheega abhaandi na bhawamwaabhu Omukuru Yeesu bhakugya nabho, naabhe Kefa?

<sup>6</sup> Kasi neenye na Barinaaba abheene, nitwe bhano tukweenderwa kukora emirimo okubha tubhone ebhigiro kwiiguru yo obhwiikari bhweetu?

<sup>7</sup> Ni musirikareki wuno akugya mwiihi kwo okwiiriha omweene? Ni murimiki wuno akweemya emizabibu mumuguundu gwaaye, na atakurya emisumo gyaku? Kweeki ni muriisyaki wuno akuriisya emitugo, na atakunywa amabheere ge emitugo giyo?

<sup>8</sup> Amang'ana gayo gano nikugaamba, gatari amiiseego ga abhaatu, naabhe emigiro gya Musa\* gyoosi gireerekya ego.

<sup>9</sup> Mumigiro gya Musa ekaamirwe kubha, “Eng'oombe hano ekuhuura engano, otayibhoha omunwa.”† Bhoono, nikwo okugaamba kubha mumang'ana gayo Taatabhugya ariiseega iguru we eziing'oombe?

<sup>10</sup> Kasi yaari aragaamba kwiiguru weetu? Niigo eri! Amakaamo gayo gakaamirwe kwiiguru weetu, kwo okubha wuno akurima na wuno akugesha, bhoosi bhareenderwa okwiisiga kubha bharabhona esoondo.

<sup>11</sup> Etwe tukabharwaazira amang'ana iguru wa Krisito, kyeego omuutu wuno akweemya

---

\* **9:8 Musa.** Rora eng'ana yino mu Bhugaruri bhwa Amang'ana Amakong'u. † **9:9** Rora Obhuhiiti bhwe Emigiro 25:4.

eziimbibho. Bhoono, ni ng'ana kong'u kweemwe okutuha ebhigiro bhyo okurya no bhyo okunywa, okubha tubhone obhweera, kyeego omuutu wuno akugesha?

<sup>12</sup> Eraabhe abhaandi bharang'arira okuhaanwa ebhigiro kya bhiyo okurwa kweemwe, bhoono etwe, tutakung'arira bhukong'u kuhaanwa ebhigiro bhiyo?

Nawe etwe tutakutunia gano tung'ariiri kuhaanwa na neemwe, nawe twiikong'eereerye mugoosi, okubha tutaaza kubharibhira abhaatu okwiikirirya Amang'ana Amazomu iguru wa Krisito.

<sup>13</sup> Mbe, mutamenyiri kubha bhano bhakukora emirimo mwiiseengerero‡ rya Taatabhugya, bharabhona ebhyaakurya bhyaabhu okurwa mwiiseengerero muyo? Kweeki, mutamenyiri kubha bhano bhakukora emirimo gya ahagiho ho okuruusirya ekimweeso, bharabhona esoondo yaabhu, okurwa mubhigiro bhino bhikuruusibhwa ekimweeso?

<sup>14</sup> Kweeki Omukuru Yeesu aswaagirye egoego, bhano bhakurwaaza Amang'ana Amazomu, bhabhe bharabhona ameendi gaabhu kutuukana ne emirimo giyo.

<sup>15</sup> Nawe enye nikyaari kutunia naabhe rumwe mugano nikung'arira kuhaanwa. Kweeki nitakukaama ego, okubha nihaabhwe gayo. Kweenye hakiriku okukwa kukira kusakiribhwa ebhigiro okurwa kweemwe, kwo okubha nitakweenda omuutu wowoosi anirekye

---

‡ **9:13 Eriiseengerero.** Rora eng'ana yino mu Bhugaruri bhwa Amang'ana Amakong'u.

okwiiguungya kwiiguru yo okuraarika  
Amang'ana Amazomu, kwe enzira yo okuuniha  
ebhigiro.

<sup>16</sup> Enye nitakung'arira okwiiguungya kwe  
ekigirirye kyo okurwaaza Amang'ana Amazomu,  
kwo okubha emirimo giyo nigyo nitumirwe  
kukora. Kweeki niraaza kurora enye, eraabhe  
nitakurwaaza Amang'ana Amazomu gayo.

<sup>17</sup> Eraabhe niingabheeri nirakora emirimo gino  
kwo obhuseegi bhwaane omweene, niingisigiri  
kubhona esaambo. Nawe etari ego kweenye, kwe  
ekigirirye Taatabhugya aniheeri omurimo guno  
kwo obhuseegi bhwaaye, okubha nigukore.

<sup>18</sup> Bhoono esaambo yaane niki? Esaambo  
yaane niyo okurwaaza Amang'ana Amazomu  
kutama kurihwa, kutama kutunia gano  
nikung'arira kuhaanwa kwiiguru yo okurwaaza  
Amang'ana gayo.

### *Amang'ana gano abheega bhakeenderwa kukora*

<sup>19</sup> Enye nitari omugya wo omuutu wowoosi,  
niri mwiiragaanzi. Nawe niituuriri kubha  
omugya wa abhaatu bhoosi, okubha  
okubhasakirya abhaatu bhaaru bhamwiikirirye  
Krisito.

<sup>20</sup> Ku Bhayahudi, niari kyeego Omuyahudi,  
okubha nibhasakirye bhamwiikirirye Krisito.  
Enye omweene nitari iyaasi we emigiro gya  
Musa, nawe nikiituura iyaasi we emigiro giyo,  
kubhano bhakutuniirira emigiro giyo, okubha  
nibhasakirye bhamwiikirirye Krisito.

<sup>21</sup> Kubhano bhatana emigiro gya Musa, niari  
kyeego omuutu wuno atana emigiro giyo,

okubha nibhasakiryeye bhamwiikiriryeye Krisito. Yiyo etana obhugazuro kubha nitana emigiro embere wa Taatabhugya. Nawe ninagyo kwe ekigiriryeye nirakaangatibhwa ne emigiro gya Krisito.

<sup>22</sup> Kubhano bhakyaari kukong'a mubhwiikirirya, niari kyeego wuno akyaari kukong'a mubhwiikirirya okubha okubhasakirya bhamwiikiriryeye Krisito. Nikakora goosi kubhaatu bhoosi, okubha kwe tuubho yoyoosi yirya nibhatuurye nyakara abhamwe bhaabhu.

<sup>23</sup> Nirakora gayo goosi kwiiguru ya Amang'ana Amazomu okubha nigwaatane na abhaandi murubhaango rwaaye.

<sup>24</sup> Mutamenyiri kubha abhaatu bhano bhakuhizana okuryaara, bhararyaara bhoosi, nawe wuno akusuung'aana esaambo ni wumwe ego? Bhoono mubhe muraryaarya bhukong'u, okubha musuung'aane esaambo.

<sup>25</sup> Bhano bhakuhizana mwiibharaana, bhariiriibha mumaaru kwiiguru ya mahizano. Bhakukora ego okubha bhasuung'aane orusaangarya rwe eribhaga iguhi ego. Nawe etwe turakora ego, okubha tusuung'aane orusaangarya runo ruragumira kirakeego.

<sup>26</sup> Kwe ekigiriryeye kiyoye enye nitakuryaara kyo omuutu wuno akuryaara bhusa, kweeki nitakurwaana kyo omuutu wuno akutaasa ekuundi bhusa.

<sup>27</sup> Nawe niragunyaakya no okugunarya omubhiri gwaane kukong'era, okubha okuhita yo okubharwaazira abhaatu Amang'ana

Amazonu, enye omweene nitaaza  
okwaangibhwa embere wa Taatabhugya.

## 10

*Obhurekya iguru yo okuseengera emisaambwa  
gyo okubhaazwa*

<sup>1</sup> Abhahiiri bhaane, ndeenda muhiite kubha, eriibhaga bhazaazi bheetu bhakareka Misiri, bhoosi bhaari bharakaangatibhwa ne eriisaaro,\* kweeki bhoosi bhakahita gatigati we enyaanza.

<sup>2</sup> Hano bhaakaangatiibhwe ne eriisaaro no okuhita gatigati we enyaanza, bhoosi bhakabha bhabatiiziibhwe kubha abhaanabheega bha Musa.†

<sup>3</sup> Bhoosi bhakarya ebhyaakurya bhino bhyaarwiiri mwiisaaro.‡

<sup>4</sup> Kweeki bhoosi bhakanywa amaanzi garya gano Taatabhugya akabhaha kwe enzira yo okuruguurya, okurwa kwiitare.§ Eriitare riyo ryaari ni Krisito. Ewe yaari arageenda hamwe nabho.

<sup>5</sup> Nawe abhaaru gati waabhu, bhaari bharakora gano gatamuzomeeri Taatabhugya, kweego bhakasikibhwa, ebhituundu bhyaabhu bhikanyaragana mwiitirigo.

<sup>6</sup> Ambe, amang'ana gayo goosi ni bhireengyo kweetwe, okubha tutabha turiigoomba amabhiihu, kyeego bhurya ebho bhaari bhakwiigoomba amabhiihu.

\* **10:1** Rora Okurwa 13:21-22. † **10:2** Rora Okurwa 14:22-29.

‡ **10:3** Rora Okurwa 16:35. § **10:4** Rora Okurwa 17:1-7; Obhubhari 20:2-17.

<sup>7</sup> Mutabha muraseengera emisaambwa, kyeego bhurya abhaandi gati waabhu bhaari bhakukora. Iguru waabhu ekaamirwe mu Makaamo Amahoreeru, “Abhaatu bhakiikara okurya no okunywa, na ibhaga riindi bhakiimeerera okubhina no okukora amang’ana ge eziisoni.”\*

<sup>8</sup> Kweeki tutatuungira, kyeego bhurya abhaandi gati waabhu bhaari bharakora, tee orusiku rumwe bhakasikibhwa abhaatu ebhikwe miroongo ebhiri na bhatatu (23,000).†

<sup>9</sup> Kweeki tutabha turamusakya Omukuru,‡ kyeego bhurya abhaandi gati waabhu bhaamusakirye, bhakarumwa ne eziinzoka, bhakakwa.§

<sup>10</sup> Kweeki mutiiririirira kyeego bhurya abhaandi gati waabhu bhakaririirira, bhakiitwa na maraika omusikya.\*

<sup>11</sup> Ambe, amang’ana gayo goosi gano gakabhabhona ebho, gakaamirwe okubha gabhe ebhireengyo bhyo okuturekya etwe bhano tukwiikara muziisiku zino zyo obhuteero.

<sup>12</sup> Kweego, wuno akwiirora kubha yiimeereeri bhugumiru mubhwiikirirya, yiimore, ataaza kugwa.

<sup>13</sup> Obhusakya bhuno bhubhabhweeni, ni kyeego bhuno abhaatu abhaandi bhaabhweeni eziisiku zyoosi. Taatabhugya ni muheene, ewe atakubhatiga musakibhwe kukira amanaga

---

\* **10:7** Rora Okurwa 32:6. † **10:8** Rora Obhubhari 25:1-9.  
‡ **10:9 Omukuru**, amakaamo agaandi ge Ekiyunaani garabhuga, *Krisito*. § **10:9** Rora Obhubhari 21:4-9. \* **10:10** Rora Obhubhari 16:41-49.

geenyu. Hano emwe mukusakibhwa,  
Taatabhugya arabhaha amanaga go okukong'era  
ne enzira yo okuhurukira.

<sup>14</sup> Kweego, abhaseegwa bhaane, mwiiriihe  
mutaseengera emisaambwa gyo okubhaazwa.

<sup>15</sup> Niragaamba na neemwe bhano muna  
amang'eeni, kweego mwiiseege emwe abheene  
iguru wa gano nikugaamba.

<sup>16</sup> Bhoono, hano tukunyweera ekikoombe  
eribhaga rye ebhyaakurya bhyo Omukuru,  
kwiiguru yo okubhuga, "Ozomirye,  
Taatabhugya," turabha turiisaangya  
mumanyiinga ga Krisito. Kweeki, hano  
tukubhega omukaate no okurya, turabha  
tugwaateeni mumubhiri gwa Krisito.

<sup>17</sup> Omukaate guyo guno tukugwaatana etwe  
twoosi ni gumwe. Kweego, etwe twoosi ni  
mubhiri gumwe, yiingabha turi bhaaru.

<sup>18</sup> Murore Abhiiziraeri. Abhaatu bhano  
bhakurya bhino bhiruusiibhwe ekimweeso  
ahagiho okuruusirya ekimweeso,  
bharagwaatana na Taatabhugya kwe enzira ye  
ekimweeso kiyo.†

<sup>19</sup> Bhoono, ndeenda kugaambaki?  
Ebhyaakurya bhino bhikuruusibhwa  
kumisaambwa gyo okubhaazwa bhino obhweera  
bh wobhwoosi? Kasi emisaambwa gyo  
okubhaazwa nacyo ni kigiro?

<sup>20</sup> Zeyi! Ndeenda okubhuga ekimweeso kino  
bhakuruusya abhaatu bhano bhatamumenyiri  
Taatabhugya, bhatakumuruusirya Taatabhugya,

---

† **10:18** Rora Abharaawi 7:6-10, 14-15.

nawe bhararusya kumasaambwa amabhi. Na neenye nitaseegiri emwe mugwaatane na amasaambwa.

<sup>21</sup> Mutakweenderwa okunyweera ekikoombe kyo Omukuru na kya amasaambwa. Mutakweenderwa kurya ebhyaakurya bhyo Omukuru na bhya amasaambwa.

<sup>22</sup> Kasi, tureenda kumukora Omukuru abhe ne eriihari? Muriiseega kubha tune eziinguru kukira ewe?

*Gano abhiikirirya bhakukora gamuguungye Taatabhugya*

<sup>23</sup> Abhaatu abhaandi gati weenyu bharabhuga, “Ebhihiro bhyoosi bhiikiririibhwe kukorwa.” Nawe enye niragaamba kubha, bhitari bhyoosi bhino bhino obhweera kweetwe. Kweeki bharabhuga, “Ebhihiro bhyoosi bhiikiririibhwe kukorwa.” Nawe enye niragaamba kubha, bhitari bhigiro bhyoosi bhino bhikusakirya obhwiikirirya bhweetu bhugumire.

<sup>24</sup> Omuutu atakomya gano gakumusakirya ewe omweene ego, nawe akomye gano gakusakirya abharikyaaye.

<sup>25</sup> Murye ebhihiro bhyoosi bhino bhikuguribhwa mumuteera mutabhuuryabhuurya, okubha mutanyaaka mumitima gyeenyu,

<sup>26</sup> kwo okubha Amakaamo Amahoreeru garabhuga, “Ekyaaro hamwe ne ebhihiro bhyoosi bhino bhiri muusi wamu, ni bhyo Omukuru.”<sup>‡</sup>

<sup>27</sup> Eraabhe omuutu wuno atari mwiikirirya abhaginihirye okurya, neemwe mwiikiriye

<sup>‡</sup> 10:26 Rora Zaburi 24:1.

kugya, murye ebhigiro bhyoosi bhino abhabhanuriiri mutabhuuryabhuurya, okubha mutanyaaka mumitima gyeenyu.

<sup>28</sup> Nawe eraabhe omuutu aribhabhuurira, “Ebhyaakurya bhino bhiseengeerwe emisaambwa gyo okubhaazwa,” hayo mutarya ebhyaakurya bhiyo, kwiiguru yo omuutu wuno abhabhuuriiri, kweeki kwiiguru ya amasemo go omutima.

<sup>29</sup> Hano nikugaamba kubha, “Kwiiguru ya amasemo ga mumutima,” nitakugaamba iguru ye emitima gyeetu, nawe iguru yo omutima gwo omuutu wuno abhabhuuriiri. Nawe kwaki amasemo ga mumutima gwo owuundi, garibhire obhwiragaanzi bhwaane?

<sup>30</sup> Eraabhe enye nirarya ebhyaakurya bhiyo kwo okubhuga, “Ozomirye, Taatabhugya,” kwaki nitukwe kwe ekigirirye kye ebhyaakurya bhino nibhugiri, “Ozomirye, Taatabhugya?”

<sup>31</sup> Ambe bhoono, kyokyoosi kino mukukora, ebhe kurya, ebhe kunywa, kasi ekigiro ekiindi, mukikore kwiiguru yo okumuguungya Taatabhugya.

<sup>32</sup> Mutabha murasariirya Abhayahudi, naabhe abhaatu bhano bhatari Abhayahudi, naabhe abhaatu bhe ekanisa ya Taatabhugya.

<sup>33</sup> Mubhe kyeego enye niri. Ndakora omukya kubhazomeerya abhaatu bhoosi kwa amang’ana goosi gano nikukora. Etari kubha nirakora ego, okubha nibhone obhweera omweene, nawe nirakora ego okubha abhaatu bhaaru bhabhone obhweera kwo okubhona obhutuurya.

# 11

<sup>1</sup> Kweego muniege enye, kyeego enye woosi nikumweega Krisito.

*Obhuzaabhi bhwo okusabha*

<sup>2</sup> Nirabhakumya kwe ekigirirye muranihiita mumang'ana goosi, no okugwaata ameegyo gano niabhaheeri.

<sup>3</sup> Nawe bhoono ndeenda mumenye kubha obhukaangati bhwo omusubhe wowoosi bhurareka ku Krisito, no obhukaangati bhwo omukari bhurareka kumusubhe waaye, no obhukaangati bhwa Krisito bhurareka ku Taatabhugya.

<sup>4</sup> Kweego, omusubhe wowoosi wuno akukuundikirya omutwe hano akusabha, kasi hano akuruusya obhurooti, wuyo aramusuukya Krisito, wuno niwe omukaangati waaye.

<sup>5</sup> Neewe omukari wuno atakukuundikirya omutwe gwaaye hano akusabha, kasi hano akuruusya obhurooti, wuyo aramusuukya omusubhe waaye, wuno niwe omutwe gwaaye. Erabha ego, kwo okubha arabha kyo omukari wuno amwiiri oruhara.\*

<sup>6</sup> Eraabhe omukari atakukuundikirya omutwe gwaaye, amwe eziinzweeri zyaaye! Nawe ni soni kwo omukari okumwa eziinzweeri zyaaye, kweego, hakiriku akuundikirye omutwe gwaaye.

<sup>7</sup> Etakung'arira kumusubhe okukuundikirya omutwe, kwo okubha ewe ni tuubho no obhuguungo bhwa Taatabhugya. Nawe omukari areerekya obhuguungo bhwo omusubhe waaye.

---

\* **11:5** Eriibhaga riyo ryaari ni soni kwo omukari okumwa oruhara.

<sup>8</sup> Niragaamba ego, kwe ekigirirye Taatabhugya atamubhuumbiri omusubhe okurwa kumukari, nawe akamubhuumba omukari okurwa kumusubhe.

<sup>9</sup> Naabhe Taatabhugya atamubhuumbiri omusubhe kwiiguru yo omukari, nawe akamubhuumba omukari kwiiguru yo omusubhe.

<sup>10</sup> Kwiiguru ya riyo, kweeki kwiiguru ya bhamaraika, omukari areenderwa okukuundikirya omutwe gwaaye, okweereky a kubha ari iyaasi yo obhukaangati bhwo omusubhe waaye.†

<sup>11</sup> Nawe kwo okugwaatana no Omukuru, omukari aramwiisiga omusubhe, neewe omusubhe ariisiga omukari.

<sup>12</sup> Niragaamba ego, kwo okubha kyeego omukari yabhuumbirwe okurwa kumusubhe, niigo ego omusubhe woosi ariibhurwa no omukari. Nawe ebhigiro bhyoosi bhirarwa ku Taatabhugya.

<sup>13</sup> Bhoono mwaamure abheene, ereenderwa omukari okumusabha Taatabhugya okutama kukuundikirya omutwe gwaaye?

<sup>14</sup> Ndora naabhe emibhiri egyeene gireereky a kubha, ni soni kumusubhe kubha ne eziinzweeri taambi!

<sup>15</sup> Nawe kumukari kubha ne eziinzweeri taambi kuramukora asuukwe,‡ kwe ekigirirye

---

† **11:10 Okweereky a kubha ari iyaasi yo obhukaangati bhwo omusubhe waaye**, obhugazuro obhuundi bhuratura kubha, *okweereky a obhukaangati bhwaaye*. ‡ **11:15 Eriibhaga riyo ryaari eziinyaangi kubhakari kutuga eziinzweeri**.

aheerwe eziinzweeri taambi okubha zibhe kyo omweenda gwo okukuundikirya omutwe.

<sup>16</sup> Nawe eraabhe omuutu areenda kuhakana iguru ya amang'ana gayo, na amenye kubha etwe tutana nyaangi eziindi kukira ziyo, naabhe mumakanisa ga Taatabhugya zitariho nyaangi eziindi.

*Enyaangi ye ebhyaakurya bhyo Omukuru*

<sup>17</sup> Ambe, mubhuswaagyo bhuno, nitakubhakumya, kwo okubha hano mukwiikumania mutakukora go obhweera, nawe murakora gano gatana obhweera.

<sup>18</sup> Niigwiiri kubha, hano mukwiikumania mukanisa, kuno obhutwaanikani gati weenyu. Na neenye niriikirirya kusuuhu kubha niigo eri.

<sup>19</sup> Obhutwaanikani bhureenderwa bhutuuke gatigati weenyu, okubha bhe eheene bhamenyekane.

<sup>20</sup> Nawe, hano mukwiikumania hamwe mutakurya ebhyaakurya bhyo Omukuru kyeego ekweenderwa,

<sup>21</sup> kwo obhugazuro omuutu wuyo woosi ararya ebhyaakurya bhyaaye okutama kuganya abhaandi. Kweego, abhaandi bharasaaga ne enzara, abhaandi bhagwaatirwe.

<sup>22</sup> Bhoono, mutana nyumba yino mukunagya okurya no okunywa? Kwaki murazeera abhaatu bha Taatabhugya no okubhasuukya bhano bhatana kigiro? Nibhabhuurireki? Nibhakumye? Zeyi! Nitakubhakumya kwiiguru ya amang'ana gayo.

*Okurya ebhyaakurya bhyo Omukuru kyeego ekweenderwa*

<sup>23</sup> Ameegyo gano nikasuung'aana okurwa ku Mukuru Yeesu, nigo gano niabhaheeri emwe kubha, obhutiku bhurya bhuno bhaamuriiri omukoonyo, akagega omukaate,

<sup>24</sup> akamubhuurira, "Ozomirye, Taatabhugya," akagubhega, akabhuga, "Guno nigwo omubhiri gwaane guno guraarusibhwe kwiiguru weenyu. Mubhe murakora ego, kwo okunihiita enye."

<sup>25</sup> Egoego, hano bhaamariri kurya ebhyaakurya, akagega amaanzi go omuzabibu§ mukikoombe, akabhuga, "Amaanzi go omuzabibu gano gariimeererera eriiragano\* eriihya rino Taatabhugya akukora, kuhitira amanyiinga gaane. Hano mukunyweera ekikoombe kino, mubhe murakora ego, kwo okunihiita enye."

<sup>26</sup> Kweego, hano mukurya omukaate guyo no okunyweera ekikoombe kiyo, murabha muraraarika okukwa kwo Omukuru tee hano araaze.

<sup>27</sup> Omuutu wowoosi wuno akurya omukaate guyo kasi okunyweera ekikoombe kiyo kyeego etakweenderwa, arabha akoriri ebhibhi, arabha azeeriri omubhiri na amanyiinga go Omukuru.

<sup>28</sup> Kweego, omuutu wowoosi yiisuunze omweene hiinga, niho arye omukaate no okunywa amaanzi go omuzabibu.

<sup>29</sup> Niragaamba ego, kwo okubha omuutu wuno akurya omukaate no okunywa amaanzi go

---

§ **11:25 Amaanzi go omuzabibu.** Rora amang'ana gano mu Bhugaruri bhwa Amang'ana Amakong'u. \* **11:25 Eriiragano.** Rora eng'ana yino mu Bhugaruri bhwa Amang'ana Amakong'u.

omuzabibu okutama okumenya kubha ano obhumwe no omubhiri gwo Omukuru, wuyo arabha yiitiniiri ekiina omweene.

<sup>30</sup> Kiyoyo nikiyo ekigirye gati weenyu bhariho abhanyookobhu na abharweeri bhaaru, na abhaandi bhakuuri.

<sup>31</sup> Eraabhe tuungisuunziri abheene, Taatabhugya atiatingatutiniiri ekiina.

<sup>32</sup> Nawe bhoono, hano tukutinirwa ekiina no Omukuru, hayo turabha turakyoorwa, okubha Taatabhugya ataaza akatutinira ekiina kyeego akubhatinira abhaatu bhano bhatakumwiigwa ewe.

<sup>33</sup> Kweego, abhahiiri bhaane, hano mukwiikumania okurya ebhyaakurya bhyo Omukuru, mwiiganye hiinga.

<sup>34</sup> Eraabhe omuutu ane enzara, arye owaaye, okubha okwiikumania kweenyu kutabhakora okutinirwa ekiina. Amang'ana agaandi gano gasaagiri, hano nikuuza niragatuura kisi.

## 12

### *Obhuturo bhwe Ekoru Muhoreeru*

<sup>1</sup> Bhoono, abhahiiri bhaane, ndagaamba iguru yo obhuturo okurwa kwe Ekoru Muhoreeru, kwo okubha ndaseega mubhumenye bhuzomu.

<sup>2</sup> Mumenyiri kubha hano mwaari mukyaari abhaatu bhano bhatamumenyiri Taatabhugya, mukang'eenwa no okukaangatwa kwo okuseengera emisaambwa gyo okubhaazwa, yiingabha emisaambwa gitana obhuhoru!

<sup>3</sup> Kweego, ndabhabhuurira omuutu wowoosi wuno akukaangatwa ne Ekoru wa Taatabhugya

atakunagya okugaamba, “Yeesu yihiimirwe.”  
 Kweeki omuutu wowoosi atakunagya  
 okugaamba, “Yeesu ni Mukuru,” eraabhe  
 atakukaangatwa ne Egoro Muhoreeru.

<sup>4</sup> Bhuriho obhuturo bhwa tuubho maanga  
 maaru, nawe Egoro Muhoreeru wuno  
 akutwaania obhuturo bhuyo ni wuyowuyo.

<sup>5</sup> Kweeki turamuhokeerya Omukuru kwa  
 tuubho maanga maaru, nawe Omukuru wuno  
 tukumuhokeerya ni wuyowuyo.

<sup>6</sup> Kweeki turakora emirimo gya tuubho nzaru,  
 nawe Taatabhugya wuno akutusakirya twoosi  
 kukora emirimo giyo ni wuyowuyo.

<sup>7</sup> Egoro Muhoreeru ariikuundukura kubhaatu  
 bhoosi, okubha abhaatu bhoosi bhabhe  
 bharabhona obhweera.

<sup>8</sup> Egoro Muhoreeru aramuha omuutu wumwe  
 okugaamba amang’ana ga amang’eeni, owuundi  
 aramuha amang’ana go obhumenyi.

<sup>9</sup> Egoro Muhoreeru wuyowuyo aramuha  
 owuundi obhuturo bhwo okubha no  
 obhwiikirirya bhukuru, owuundi obhuturo  
 bhwo okuhorya,

<sup>10</sup> owuundi obhuturo bhwo okukora ebhitiika,  
 owuundi obhuturo bhwo okuruusya obhurrooti.  
 Egoro Muhoreeru wuyowuyo aramuha owuundi  
 obhuturo bhwo okumenya eraabhe amang’ana  
 garwiiri kuziikoro eziimbiihu kasi kwe Egoro  
 Muhoreeru, owuundi obhuturo bhwo  
 okugaamba ebhigaambo ebhiindi, owuundi  
 obhuturo bhwo okugarura ebhigaambo bhiyo.

<sup>11</sup> Egoro Muhoreeru wuyowuyo owumwe  
 arakora emirimo giyo gyoosi. Ewe aramuha

omuutu wuyo woosi obhuturo bhwaaye, kyeego akuseega omweene.

*Omubhiri gumwe, ebhiimo bhyaaru*

<sup>12</sup> Omubhiri gwo omuutu gune ebhiimo bhyaaru, nawe ebhiimo bhiyo ni mubhiri gumwe. Niigo eri kumubhiri gwa Krisito nigwe ekanisa.

<sup>13</sup> Niragaamba ego, kwo okubha etwe twoosi, tubhe Abhayahudi kasi tubhe abhaatu bhe ebhyaaro ebhiindi, tubhe abhagya kasi tubhe abhiiragaanzi, tukabatiizwa kwe Ekoru Muhoreeru wumwe no okuhaabhwa Ekoru wuyo owumwe, okubha tubhe omubhiri gumwe.

<sup>14</sup> Ambe, omubhiri gutana ekiimo kimwe ego, nawe gune ebhiimo bhyaaru.

<sup>15</sup> Kyeego okuguru kuungagaambiri, “Enye nitari kubhoko, kweego enye nitari hagiho omubhiri,” gutiingabheeri hagiho omubhiri kwe ekigirirye kiyo eheene?

<sup>16</sup> Nakwo okutwi kuungagaambiri kubha, “Enye nitari riiso, kweego enye nitari hagiho omubhiri,” kutiingabheeri hagiho omubhiri kwe ekigirirye kiyo eheene?

<sup>17</sup> Eraabhe omubhiri gwoosi guungabheeri eriiso, omuutu yaranagyabhwi okwiigwa? Kasi omubhiri gwoosi guungabheeri okutwi, omuutu yaari aranagyabhwi okwiihuziirirya?

<sup>18</sup> Nawe bhoono, Taatabhugya yabhituuriri ebhiimo bhyoosi kumubhiri, kyeego bhurya yaseegiri omweene.

<sup>19</sup> Eraabhe ebhiimo bhyoosi bhiingabheeri kiimo kimwe, omubhiri gutiingabheeri mubhiri.

<sup>20</sup> Nawe ebhiimo ni bhyaaru, nawe omubhiri ni gumwe.

<sup>21</sup> Eriiso ritakunagya kubhuurira okubhoko, “Awe nitakukweenda.” Naabhe omutwe gutakunagya kubhuurira amaguru, “Emwe nitakubheenda.”

<sup>22</sup> Kutuuma gayo, ebhiimo bhyo omubhiri bhino bhikurorekana, ni bhinyookobhu, nibhyo bhikweenderwa bhukong’u.

<sup>23</sup> Kweeki ebhiimo bhino bhikurorekana kubha, bhitaakung’arira okusuukwa, nibhyo tukubhisuuka bhukong’u. Ebhiimo bhyo omubhiri gweetu kyeego bhikurorekana kubha, bhirareeta eziisoni, nibhyo tukubhituga bhukong’u,

<sup>24</sup> hano ebhiimo bhino bhitaakureeta eziisoni, bhitaakweenderwa kutugwa kyeego ebhiindi. Taatabhugya omweene agutuuriri bhuzomu omubhiri. Ebhiimo bhino bhitaakusuukwa bhukong’u, abhikoriri bhisuukwe,

<sup>25</sup> okubha omubhiri gutatwaanikana, nawe ekiimo ekimwe kisakiranie ne ekiimo ekiindi kyaku.

<sup>26</sup> Eraabhe ekiimo kimwe kyo omubhiri kikunyahaarika, bhyoosi bhiranyahaarika hamwe nakyu. Kweeki ekiimo kimwe kikukumibhwa, bhyoosi bhirazomererwa hamwe nakyu.

<sup>27</sup> Ambe, emwe mwoosi ni mubhiri gwa Krisito, na bhoosi ni kiimo kumubhiri guyo.

<sup>28</sup> Taatabhugya akatuura abheega mukanisa, bha kabhiri abharooti, bha katatu abheegya. Kweeki atuuriri bhano bhakukora ebhitiika, bho obhuturo bhwo okuhorya abharweeri, bho

obhuturo bhwo okubhasakirya abhaandi, bho obhuturo bhwo okukaangata, na bho obhuturo bhwo okutorima ebhigaambo ebhiindi.

<sup>29</sup> Bhoono, abhaatu bhoosi ni bheega? Abhaatu bhoosi ni bharooti? Abhaatu bhoosi ni bheegya? Abhaatu bhoosi bharakora ebhitiika?

<sup>30</sup> Kweeki, abhaatu bhoosi bhane obhuturo bhwo okuhorya abharweeri? Abhaatu bhoosi bharatorima ebhigaambo ebhiindi? Abhaatu bhoosi bhano obhuturo bhwo okugarura ebhigaambo bhiyo?

<sup>31</sup> Ambe, mwiigoombe kubhona obhuturo bhukuru. Nawe hiinga ndeenda kubhabhuurira enzira yino ni nzomu bhukong'u.

## 13

### *Obhuseegi*

<sup>1</sup> Naabhe niingagaamba kwe ebhigaambo bhya abhaatu na bhya bhamaraika, eraabhe nitana obhuseegi, nirabha kyo omuhumbuto gwe eriidebe rino ritana kigiro, kasi kyeego ekituri kye etoongori yino ekurira bhusa.

<sup>2</sup> Kweeki niingaruusya obhurooti no okumenya eziimbiso zyoosi no okubha no obhunagya bhwoosi, naabhe niingabheeri no obhwiikirirya bhukuru bhwo okunagya okusaamy ebhiguru, eraabhe nitana obhuseegi, enye nitari kigiro.

<sup>3</sup> Kweeki niraaruusye ebhigiro bhyaane bhyoosi okubhaha abhataka, naabhe niraaruusye omubhiri gwaane okubha gwookibhwe mumuriro,\* eraabhe nitana

---

\* **13:3 Gwookibhwe mumuriro**, amakaamo agaandi ge Ekiyu-naani garabhuga, *niikumye*.

obhuseegi, nitakubhona bhweera bhwobhwoosi.

<sup>4</sup> Obhuseegi bhuramukora omuutu agumire, abhe muzomu, abhe atana mugono, abhe atana obhwiizuungya, kweeki abhe atana kisiraani.

<sup>5</sup> Obhuseegi bhurakora omuutu abhe arabhasuuka abhaandi, bhutakumukora yiiseege amang'ana gaaye omweene, naabhe kutiinda bhwaangu, bhutakubhara amabhi.

<sup>6</sup> Obhuseegi bhurakora omuutu atazomererwa obhubhi, nawe arazomererwa obhuheene.

<sup>7</sup> Obhuseegi bhurakora abhe aragumira mugoosi, abhe ano obhwiikirirya eriibhaga ryoosi, abhe no obhwiisige eriibhaga ryoosi, kweeki abhe ariikong'ererya mugoosi.

<sup>8</sup> Obhuseegi bhutakusuuhirwa kigiro kyokyoosi. Nawe obhumenyeekererya bhwo okuruusya obhurooti no okugaamba ebhigaambo ebhiindi, no okubha na amang'eeni, obhuturo bhuyo bhwoosi bhuno obhuteero.

<sup>9</sup> Niragaamba ego kwo okubha tumenyiri amang'ana masuuhu ego, kweeki turaruusya obhurooti bhweetu kwa hasuuhwiigo, kutari obhukuunaanio.

<sup>10</sup> Nawe hano obhukuunaanio bhukuuza, gano gatakuunaaniri garahwa.

<sup>11</sup> Hano niari mwaana omurere, niari niragaamba kyo omwaana, amiiseego gaane nikiiseega kyo omwaana. Nawe bhoono, ge ekyaana nigatigiri, kwo okubha nibheeri muutu mukuru.

<sup>12</sup> Kyeego tukurora bhoono, turarora ebhigiro kyamuna bhiri mareembeeri, nawe ibhaga riindi turabhirora bhyoosi kubhweero. Bhoono

nimenyiri hasuuhu, nawe ibhaga riindi niramanya bhukong'u kyeego Taatabhugya animenyiri enye.

<sup>13</sup> Ambe bhoono, ebhigiro bhitatu bhino bhikugumira ni bhwiikirirya, eriisigo no obhuseegi. Na mumang'ana atatu gano, eriikuru ni bhuseegi.

## 14

*Obhuturo bhwo okuruusya obhurooti no bhwo okugaamba ebhigaambo ebhigini*

<sup>1</sup> Mutuniirire obhuseegi na mwiigoombe okubhona obhuturo bhwe Ekoru Muhoreeru, kiindi obhuturo bhwo okuruusya obhurooti.

<sup>2</sup> Omuutu wuno akugaamba ebhigaambo ebhigini, atakugaamba na abhaatu, nawe aragaamba na Taatabhugya, kwo okubha kino akugaamba atariho wuno akukimenya. Ewe arabha aragaamba amang'ana ge embiso mukoro yaaye.\*

<sup>3</sup> Nawe wuno akuruusya obhurooti, aragaamba na abhaatu amang'ana go okubhagumirya mubhwiikirirya, go okubhatoongera ekoro na go okubhagosorerya.

<sup>4</sup> Wuno akugaamba ebhigaambo ebhigini, ariigumirya omweene mubhwiikirirya, nawe wuno akuruusya obhurooti arabhasakirya abhiikirirya bhano bhiikumeenie okusabha.

<sup>5</sup> Enye ndeenda emwe mwoosi mubhe muragaamba ebhigaambo ebhigini, nawe

---

\* **14:2** Obhugazuro obhuundi bhuratura kubha, *Ewe arabha arabhuga amang'ana ge embiso kumanaga ge Ekoru.*

ndeenda bhukong'u mubhe muraruusya obhurooti. Niragaamba ego, kwo okubha okuruusya obhurooti kurasakirya abhiikirirya abhaandi kukira okugaamba ebhigaambo ebhigini, eraabhe atariho wuno akubhigarura ebhigaambo bhiyo. Kweego, wuno akugaamba ebhigaambo ebhigini abhigarure okubha asakirye abhiikirirya bhano bhiikumeenie okusabha, bhagumire mubhwiikirirya.

<sup>6</sup> Bhoono, abhahiiri bhaane, niraaze kweemwe no okugaamba ebhigaambo ebhigini, muranagya kubhona bhweeraki? Mutakubhona obhweera bhwobhwoosi. Nawe ndabhabhuurira gano Taatabhugya anikuundukuriiri, kasi nirabhaha obhumenyi, niraruusya obhurooti kasi nireegya, hayo murabhona obhweera.

<sup>7</sup> Niigo eri naabhe kwe ebhigiro bhino bhitari bhihoru, hano bhikuruusya eriiraka, ebhe ekireere, kasi ezeze. Eraabhe bhiraruusya eriiraka rino ritana wayo, omutu aranagyabhwi okumenya kubha guyo ni mweemboki?

<sup>8</sup> Kweeki, eraabhe ekoombyo eraruusya eriiraka rino ritakumenyekana kubhaatu, ni weewi wuno ariibhanure kwe eriihi?

<sup>9</sup> Niigo eri na kweemwe. Eraabhe muragaamba amang'ana gano gatakumenyekana, ni weewi wuno akunagya okumenya kino mukugaamba? Kweego gano mukugaamba garagya no obhukama.

<sup>10</sup> Mukyaaro kune ebhigaambo bhya tuubho nzaru, nawe kitariho naabhe ekigaambo kimwe kino kitana obhugazuro bhwaku.

<sup>11</sup> Bhoono, eraabhe nitamenyiri ebhigaambo

bhino owuundi akugaamba, nirabha kyo omugini kumuutu wuyo, neewe arabha kyo omugini kweenye.

<sup>12</sup> Niigo eri na kweemwe. Bhoono, kwo okubha muriigoomba okubhona obhuturo bhwe Ekoru Muhoreeru, mukomye bhukong'u kubha no obhuturo bhuno bhukusakirya abhiikirirya bhano mwiikumeenie okusabha.

<sup>13</sup> Kweego, omuutu wuno akugaamba ebhigaambo ebhigini, amusabhe Taatabhugya okubha amusakirye okugarura kino akugaamba.

<sup>14</sup> Niragaamba ego, kwo okubha hano nikusabha kwe ebhigaambo ebhiindi, ekoro yaane niyo ekusabha, nawe obhwoongo bhwaane bhutakubhona obhweera bhwoobhwoosi.

<sup>15</sup> Bhoono ndeenderwa kukoraki? Ndasabha kwe ekoro kukigaambo ekigini kino kitakumenyekana, kweeki ndasabha kwo obhwoongo. Ndeemba kukigaambo ekigini mukoro, kweeki ndeemba kwo obhwoongo.

<sup>16</sup> Oraamukumye Taatabhugya kwe ekoro ego, omuutu owuundi wuno atana obhuturo bhuyo bhwo okumenya ebhigaambo ebhigini, aranagyabhwi okwiitabha ozomirye ku Taatabhugya kwo okugaamba, "Gabhe ego"? Atamenyiri gano okugaamba!

<sup>17</sup> Ni heene okubhuga, "Ozomirye, Taatabhugya," kwaazo kuyo kuratura kubha kuzomu, nawe kutakumusakirya kugumira mubhwiikirirya.

<sup>18</sup> Niramubhuurira, "Ozomirye, Taatabhugya," kwe ekigirirye niragaamba kwe ebhigaambo

ebhiindi kukira emwe mwoosi,

<sup>19</sup> nawe mukanisa niraseega bhukong'u okugaamba kwo obhwoongo amang'ana ataano gano gakumenyekana, okubha nibheegye abhaandi. Riyo niryo eriizomu kukira okugaamba amang'ana ebhikwe ikumi (10,000) mukigaambo ekiindi.

<sup>20</sup> Abhahiiri bhaane, mutiiseega kya abhaana, nawe mubhe muriiseega kya abhaatu abhakuru. Nawe iguru yo obhubhi, mubhe kya abhaana abharere bhano bhakyaari kukora ng'ana embi.

<sup>21</sup> Gakaamirwe mu Makaamo Amahoreeru, "Omukuru arabhuga,

'Niragaamba na abhaatu bhano kuhitira abhagini bha kure, bhano bhakugaamba ebhigaambo ebhigini, naabhe ego bhatakuniitegeerera.'"†

<sup>22</sup> Okugaamba ebhigaambo ebhiindi ni kyeerekenio kya amanaga ga Taatabhugya iguru wa abhaatu bhano bhatari abhiikirirya, etari kyeerekenio iguru wa abhiikirirya. Nawe obhurooti bhuraruusibhwa kwiiguru wa abhiikirirya, etari kwiiguru ya abhaatu bhano bhatari abhiikirirya.

<sup>23</sup> Bhoono, eraabhe abhiikirirya bhiikumeenie okusabha, okumara bhoosi bhataange okugaamba ebhigaambo ebhiindi, niho bhasikire abhaatu bhano bhatana obhuturo bhwo okumenya ebhigaambo ebhiindi, naabhe bhano bhatari abhiikirirya, bhatakubhuga muyaangahiri?

---

† **14:21** Rora Isaya 28:11-12.

24 Nawe bhoosi bhakubha bhararuusya obhurooti, okumara asikire omuutu wuno atana obhuturo bhwo okumenya ebhigaambo ebhiindi, kasi wuno atari mwiikirirya, gano akwiigwa okurwa kubhoosi garamukora okumenya obhubhi bhwaaye. Kweeki gano akwiigwa garamutinira ekiina.

25 Gano giibhisiri mukoro yaaye, garabha mwaasi, niho bhakahigama haasi bhubhumari no okwiihiinya obhusyo tee haasi okumuseengera Taatabhugya, akugaamba, “Eheene Taatabhugya ari gati weenyu!”

### *Obhuzaabhi bhwa abhiikirirya okusabha*

26 Bhoono, abhahiiri bhaane, tubhugebhwi? Hano mwiikumeenie kusabha, owumwe areemba omweembo, owuundi areegya, owuundi arabhuga gano Taatabhugya amukuundukuriiri, owuundi aragaamba ebhigaambo ebhiindi, no owuundi aragarura. Amang’ana gayo goosi gakoreke okugumirya abhiikirirya.

27 Eraabhe bhariho bhano bhakugaamba ebhigaambo ebhiindi, bhagaambe bhabhiri kasi bhatatu ego, bhatakira bhayo, agaambe owumwe kwo owumwe, kweeki abheho omuutu wo okugarura gano bhakugaamba.

28 Eraabhe atariho omuutu wo okugarura, wuno akugaamba ebhigaambo ebhiindi atige okugaamba mukansa, nawe agaambe na Taatabhugya mukoro yaaye.

29 Na bhano bhakuruusya obhurooti, bhagaambe bhabhiri kasi bhatatu, na abhaandi

bhagareengye amang'ana gaabhu.

<sup>30</sup> Nawe eraabhe owuundi mubhano bhakwiitegeerera akuundukuriirwe eng'ana okurwa ku Taatabhugya, wo okutaanga wuno yaari akugaamba akire.

<sup>31</sup> Kwe enzira yiyo, emwe mwoosi murabhona omweeya gwo okuruusya obhurooti, okubha abhaatu bhoosi bheegiibhwe no okutoongerwa ekoro.

<sup>32</sup> Obhuturo bhwo okuruusya obhurooti, bhurakaangatwa na wuno ano obhuturo bhuyo,

<sup>33</sup> kwo okubha Taatabhugya weetu atari wo orwaambi, nawe ni wo omureembe.

Kyeego eri mumakanisa goosi ga abhahoreeru,

<sup>34</sup> hano mukubha mwiikumeenie, abhakari bhakire mukanisa, kwo okubha bhatakwiikiriribhwa okugaamba. Bhabhe abhiigwa kyeego emigiro gya Musa gikubhuga.

<sup>35</sup> Eraabhe bhareenda okumenya eriing'ana eriirebhe, bhabhe bharaabhabhuurya abhasubhe bhaabhu mumigye gyaabhu, kwo okubha ni soni omukari okugaamba mukanisa.

<sup>36</sup> Mbe, eng'ana ya Taatabhugya erwiiri kweemwe? Kasi ebhahikiiri emwe abheene ego?

<sup>37</sup> Eraabhe omuutu ariirora kubha ano obhuturo bhwo okuruusya obhurooti, kasi ano obhuturo obhuundi bhwe Ekoro Muhoreeru, amenye kubha, gano nikubhakaamira, ni bhuswaagyo okurwa ku Mukuru.

<sup>38</sup> Nawe omuutu wuno akurega gayo, neewe abhe araregwa.‡

---

‡ 14:38 *Neewe abhe araregwa*, amakaamo agaandi ge Ekiyu-naani garabhuga, *neewe araregwa*.

<sup>39</sup> Kweego, abhahiiri bhaane, mukore omukya bhukong'u okuruusya obhurooti, mutabha muramuribhira omuutu okugaamba ebhigaambo ebhigini.

<sup>40</sup> Nawe amang'ana goosi gakorwe bhuzomu, kweeki kwo obhuzaabhi.

## 15

### *Okuryoorwa kwa Krisito*

<sup>1</sup> Bhoono, nirabhahiitya abhahiiri bhaane, Amang'ana Amazomu gano niarwaaziri kweemwe, na neemwe mwagasuung'aaniri. Amang'ana amazomu gayo nigo gabhakoriri mwiimeereeri bhugumiru.

<sup>2</sup> Eraabhe muragwaata amang'ana gano niarwaaziri kweemwe, hayo murabhona obhutuurya. Nawe eraabhe mutakugagwaata, obhwiikirirya bhweenyu bhurabha bhutana obhweera.

<sup>3</sup> Nikabheegya ameeqyo go obhweera gano enye omweene niasuung'aaniri, kubha Krisito akakwa kwiiguru we ebhibhi bhyeetu, kyeego gakaamirwe mu Makaamo Amahoreeru.\*

<sup>4</sup> No okubha, akabhiikwa na akaryoorwa orusiku rwa katatu, kyeego ekaamirwe mu Makaamo Amahoreeru.†

<sup>5</sup> Akiyeerekya ku Kefa, kweeki akiyeerekya kubheega bhaaye ikumi na bhabhiri.

<sup>6</sup> Ibhaga riindi akiyeerekya kubhiikirirya bhano bhaari bhakiriri magana ataano (500) kwa hamwe. Abhaaru gati waabhu bhakyaari

---

\* **15:3** Rora Isaya 53:5-12. † **15:4** Rora Zaburi 16:8-10.

bhahoru tee bhoono, nawe abhaandi bhamariri kukwa.

<sup>7</sup> Kyaamwe akiiyeerekya ku Yaakobo, na akiiyeerekya kubheega bhoosi.

<sup>8</sup> No obhuteero bhwa abhaatu bhoosi, Yeesu akiiyeerekya kweenye Pauro, nikabha omweega waaye, kwiibhaga rino nitaari na wayo.

<sup>9</sup> Otakunagya kuniriing'ania enye na abheega abhaandi bhoosi, nitakung'arira naabhe okubhirikirwa omweega, kwo okubha nikabhanyaakya abhiikirirya.

<sup>10</sup> Nawe orubhaango rwa Taatabhugya nirwo rukoriri enye nibhe omweega. No orubhaango rwaaye runo obhweera kweenye, kwo okuhitira orubhaango ruyo, nikoriri emirimo kukira abheega bhoosi. Nitaakoriri gayo kwa amanaga gaane omweene, nawe Taatabhugya kwo orubhaango rwaaye niwe yakoriri emirimo hamwe neenye.

<sup>11</sup> Ambe, nibhe enye, kasi bhabhe abheega abhaandi, turarwaaza amang'ana garyagarya, nigo mukugiikirirya.

### *Okuryoorwa kwa abhaku*

<sup>12</sup> Bhoono, eraabhe turwaaziri kubha Krisito yaryoorirwe okurwa mubhaku, erabhabhwi abhaandi gati weenyu bharabhuga abhaku bhatakuryoorwa?

<sup>13</sup> Eraabhe abhaku bhatakuryoorwa, ambe, Krisito neewe ataaryoorirwe.

<sup>14</sup> Ne eraabhe Krisito ataaryoorirwe, obhurwaazi bhweetu bhutana bhweera, naabhe obhwiikirirya bhweenyu bhutana bhweera.

15 Kweeki, etwe tuungarorekeeni kubha abhamenyeekeererya bho orurimi iguru wa amang'ana ga Taatabhugya, kwo okubha tureereky'a kubha Taatabhugya akamuryoora Krisito okurwa mubhaku. Nawe eraabhe abhaku bhatakuryoorwa, ambe, Taatabhugya ataamuryooriri Krisito.

16 Niragaamba ego, kwe ekigirirye eraabhe abhaku bhatakuryoorwa, neewe Krisito ataaryoorirwe.

17 Ne eraabhe Krisito ataaryoorirwe, obhwiikirirya bhweenyu bhurabha bhutana bhweera, kweeki murabha mukyaari kutuuribhwa okurwa mubhibhi bhyeenyu.

18 Kutuuma gayo, abhaatu bhoosi bhano bhakuuri bhamwiikiriirye Krisito, bhabhuriri kimwe.

19 Eraabhe erisigo ryeetu ku Krisito ni ryo okubhona obhuhoru bhwa mukyaaro kino ekyeene, hayo niho tukubha abhaatu bho okurorerwa ebhigoongi kukira abhaatu bhoosi.

20 Nawe bhoono, obhuheene ni kubha Krisito akaryoorwa okurwa mubhaku, neewe niwe omutaangi okuryoorwa mubhaku.

21 Kyeego oruku rwareetirwe no omuutu wumwe mukyaaro, niigo ego obhuryoori bhwa abhaku nabhwo bhwareetirwe no omuutu wumwe.

22 Na kyeego abhaatu bhoosi bhakukwa kwo okugwaatana kwaabhu na Adaamu, ego niigo abhaatu bhoosi bharyoorwa kwe ekigirirye kyo okugwaatana kwaabhu na Krisito.

23 Nawe omuutu wowoosi araryoorwa

kwiibhaga ryaaye, Krisito niwe omutaangi okuryoorwa, okumara abhaatu bhaaye bhararyoorwa, hano Krisito araaze.

<sup>24</sup> Hayo niho bhukuuza obhuteero bhwe ebhigiro bhyoosi, hano Krisito araamuhe Taatabhugya Taata obhutemi, hano araamare okusikya abhakaangati bhoosi, bho obhunagya bhwoosi na bha amanaga goosi.

<sup>25</sup> Niragaamba ego, kwo okubha Krisito areenderwa akaangate tee, Taatabhugya abhahize abhabhisa bhaaye bhoosi no okubhatuura iyaasi wo obhukaangati bhwaaye.‡

<sup>26</sup> Omubhisa wo obhuteero okusikibhwa ni ruku.

<sup>27</sup> Amakaamo Amahoreeru garabhuga, “Taatabhugya atuuriri ebhigiro bhyoosi iyaasi wo obhukaangati bhwaaye.”§ Amang’ana gayo “ebhigiro bhyoosi,” gatana obhugazuro kubha neewe Taatabhugya aterwe iyaasi wo obhukaangati bhuyo. Zeyi, kwo okubha ewe niwe atuuriri ebhigiro bhiyo iyaasi wo obhukaangati bhwa Krisito.

<sup>28</sup> Na hano ebhigiro bhyoosi bhiraabhe bhiteerwe iyaasi wo obhukaangati bhwo Omwaana waaye,\* niho Omwaana woosi, ariituura iyaasi wo obhukaangati bhwa Taatabhugya wuno atuuriri ebhigiro bhyoosi iyaasi wo obhukaangati bhwo Omwaana waaye,

‡ 15:25 *Okubhatuura iyaasi wo obhukaangati bhwaaye*, ku Kiyunaani ni, *kubhatuura iyaasi wa amaguru gaaye*. Rora Zaburi 110:1. § 15:27 Rora Zaburi 8:6. \* 15:28 *Omwaana waaye*. Rora *Omwaana wa Taatabhugya* mu Bhugaruri bhwa Amang’ana Amakong’u.

okubha Taatabhugya abhe omukaangati wa bhyoosi.

<sup>29</sup> Bhoono, abhaatu bhano bhakubatiizwa kwiiguru wa abhaku bhariisiga kubhonaki? Eraabhe abhaku bhatakuryoorwa naabhe orusiku rumwe, kwaki abhaatu bharabatiizwa kwiiguru waabhu?

<sup>30</sup> Na neetwe kwaki turiituura ahabhi eziisiku zyoosi?

<sup>31</sup> Abhahiiri bhaane, eziisiku zyoosi enye niri ahabhi ho okukwa. Na yino ni heene, kyeego nikwiikumya iguru weenyu, kwo okubha mugwaateeni na Krisito Yeesu Omukuru weetu.

<sup>32</sup> Eraabhe eriisigo ryaane riingabheeri rye ekyaaro kino ego, okwiitana kwaane na abhabhisa bhaane bhano bhakutuubhana kye ebhityeenyi ebhihaari mumugye gwa Efeso kuunganisakiiryeki? Eraabhe abhaku bhatakuryoorwa, kweego tuunganagirye okukora kyeego bhakugaamba, ambe, “Tubhe turarya no okunywa, kwo okubha tabhoori turakwa.”†

<sup>33</sup> Mutang’eenwa na abhaatu bhano bhakugaamba ego, kwo okubha, “Abhasaani abhabhi, bharasarya eteemwa enzomu.”

<sup>34</sup> Mutaange okuhokeerya obhwoongo kyeego ekweenderwa, na mutakora ebhibhi, kwo okubha abhaandi gati weenyu bhatamumenyiri Taatabhugya. Niragaamba gayo, okubha nibhasuukye.

*Omubhiri kyeego guraabhe orusiku rwo obhuryoori*

---

† 15:32 Rora Isaya 22:13.

<sup>35</sup> Omuutu aratura okubhuurya, “Abhaku bhararyoorwa igabhwi? Na bharabha no omubhiri gwa tuubhoki?”

<sup>36</sup> Gayo ni amabhuuryo ge ekigeege! Okweemya eziimbibho, zitakutura kumera okutama kukwa.

<sup>37</sup> Embibho yino mukweemya, ebhe engano kasi embibho eyiindi, etakutuubhana ne ekituutu kyaku.

<sup>38</sup> Taatabhugya arayiha embibho eriikaanda kyeego akweenda, embibho yiyo yoosi arayiha eriikaanda kwe etuubho yaku.

<sup>39</sup> Ebhigiro bhyoosi bhine emibhiri, nawe mumibhiri giyo gitatuubheeni. Emibhiri gya abhaatu ni tuubho yimwe, gye ebhityeenyi ni tuubho yiindi, gye ebhinyonyi ni tuubho yiindi, nago gye eziiswe ni tuubho yiindi.

<sup>40</sup> Kweeki giriho emibhiri gya mwiisaaro ne emibhiri gya mukyaaro. Obhuzomu bhwe emibhiri gya mwiisaaro bhuri bhuundi, no obhuzomu bhwe emibhiri gya mukyaaro bhuri bhuundi.

<sup>41</sup> Obhuzomu bhwo omubhaso bhuri bhuundi, obhuzomu bhwo omweeri bhuri bhuundi no obhuzomu bhwe eziinzota bhuri bhuundi. Eziinzota nazyo, yimwe yazyo eno obhuzomu bhwaaye.

<sup>42</sup> Ego niigo eraabhe, eriibhaga hano abhaku bharaaryoorwe. Kyeego eziimbibho zikweemibhwa, ni kyeego omubhiri guno gukubhiikwa gukusarika, nawe guno gukuryoorwa gutakusarika.

<sup>43</sup> Hano omubhiri gukubhiikwa, gurazeerwa,

nawe hano gukuryoorwa, gurazoma. Hano gukubhiikwa, gubheeri munyookobhu, nawe hano gukuryoorwa, gurabha na amanaga.

<sup>44</sup> Hano gukubhiikwa ni mubhiri gwe esimuka, nawe hano gukuryoorwa ni mubhiri omuhya guno tukuhaabhwa ne Ekoru Muhoreeru. Guriho omubhiri gwe esimuka, kweego guriho omubhiri omuhya guno Ekoru Muhoreeru akutuha.

<sup>45</sup> Gakaamirwe mu Makaamo Amahoreeru, “Omuutu wo okutaanga ni Adaamu, akabhuumbwa akabha muutu muhoru,”<sup>‡</sup> nawe Adaamu wo obhuteero ni Krisito, niwe Ekoru wuno akubhaha abhaatu obhuhoru.

<sup>46</sup> Nawe omubhiri guno gukukaangata ni gwe esimuka, niho gukuuza omubhiri muhya guno tukuhaabhwa ne Ekoru Muhoreeru.

<sup>47</sup> Omuutu wo okutaanga mukyaaro ni Adaamu, akabhuumbwa kwo obhutoto. Omuutu wa kabhiri, Krisito, akarwa mwiisaaro.

<sup>48</sup> Eraabhe abhaatu bhoosi mukyaaro bhano omubhiri gwa mukyaaro kyo omubhiri gwa Adaamu. Na abhaatu bhoosi mwiisaaro bharabha no omubhiri gwa mwiisaaro kyo omubhiri gwa Krisito.

<sup>49</sup> Kyeego tutuubheeni na Adaamu, wuno yabhuumbirwe kwo obhutoto, ego niigo turaatuubhane na Krisito, wuno yarwiiri mwiisaaro.

<sup>50</sup> Abhahiiri bhaane, kino nikweenda kugaamba ni kubha, emibhiri gyeetu gino tunagwo na amanyiinga bhitakunagya kusikira mubhutemi bhwa Taatabhugya, na bhino

---

<sup>‡</sup> 15:45 Rora Obhweemero 2:7.

bhikukwa bhidakunagya kubha no obhuhoru bhwa kirakeego.

<sup>51</sup> Mwiitegeerere, ndabhabhuurira embiso, etwe twoosi tutakukwa, nawe twoosi turiikyoorwa.

<sup>52</sup> Kituukiro, okuhiindirirya no okuramukya, hano ekoombyo yo obhuteero, eraarire. Hayo niho, abhaku bhararyoorwa na bharabha ne emibhiri gino gitakusarika kweeki, na neetwe bhano tukyaari bhahoru, turiikyoorwa twoosi.

<sup>53</sup> Erabha ego, kwo okubha emibhiri gino gikusarika gireenderwa giikyooore gibhe emibhiri gino gitakusarika, emibhiri gino gikukwa giikyooore gibhe emibhiri gino gitakukwa.

<sup>54</sup> Ambe, omubhiri guno gukusarika no okukwa, hano gukwiikyoorwa kubha omubhiri guno gutakusarika no okukwa, hayo niho rikubha rikuunaaniri eriing'ana rino rikakaamwa mu Makaamo Amahoreeru gano gakubhuga, “Taatabhugya ahiziri oruku, kwa amanaga gaaye!”§

<sup>55</sup> “Awe Oruku, obhuhizi bhwaazo bhuri hayi? Gari hayi amanaga gaazo go okureeta obhururu?”\*

<sup>56</sup> Amanaga go oruku garatuukana ne ebhibhi bhino tukukora, na amanaga ge ebhibhi garatuukana ne emigiro.

<sup>57</sup> Nawe tumubhuurire, “Ozomirye, Taatabhugya.” Ewe aratuha obhuhizi kwe enzira yo Omukuru weetu Yeesu Krisito.

<sup>58</sup> Kweego, abhahiiri bhaane abhasegwa, mugumire mubhwiikirirya bhuyo, mutige

---

§ 15:54 Rora Isaya 25:8. \* 15:55 Rora Hosea 13:14.

kuhuumba. Mugeenderere kukora emirimo gyo Omukuru kwo omukya eziisiku zyoosi, kwo okubha mumenyiri emirimo gino mukukora kwiiguru wo Omukuru, gitari gya bhusa.

## 16

### *Emisororo gyo okubhasakirya abhiikirirya*

<sup>1</sup> Bhoono, niragaamba iguru ye emisororo gyo okubhasakirya abhahoreeru bha mumugye gwa Yerusaremu. Emwe kweeki mukore kyeego niabhabhuuriiri abhaatu bha mumakanisa ge ekyaaro kya Garatia.

<sup>2</sup> Eziisiku zyoosi zyo okutaanga zyo obhutuuro, omuutu wowoosi gati weenyu abhe aratuura ehata kuriing'aana no okubhona kwaaye, okubha eriibhaga hano nikuuza kweemwe, mubhe mumariri kukumania omusororo.

<sup>3</sup> Hano niraaze, nirabhatuma ne eziinyaarubha zyo okumenyeeekererya abhaatu bhano mubhasoriri okubha bhahire emisororo giyo mumugye gwa Yerusaremu.

<sup>4</sup> Ne eraabhe erirorekana kubha, enye woosi nireenderwa kugya, niragya hamwe nabho.

### *Obhuzaabhi bhwa Pauro bhwo okuhika Koriinto*

<sup>5</sup> Niraaza kweemwe eyo, hano nikurwa mukyaaro kya Makedonia, kwo okubha ndeenda hiinga nihitire mukyaaro kya Makedonia.

<sup>6</sup> Hano niraaze, hamwe niriikara neemwe kwiibhaga iguhi, kasi kwe eriibhaga ryoosi rye embeho, okubha munisakirye okugeenderera no orugeendo rwaane rwo okugya hohoosi hano nikweenda kugya.

<sup>7</sup> Nitaseegiri kurorana neemwe bhoono no okuhita ego. Niriisiga kwiikara kweemwe kwiibhaga, eraabhe Omukuru araaniikirirye.

<sup>8</sup> Nawe bhoono nirasaaga mumugye gwa Efeso, tee orusiku rwe enyaangi ya Pentekositi ruhike.

<sup>9</sup> Nirakora ego, kwo okubha Taatabhugya aniiguriiri enzira yo okukora emirimo mikuru mumugye guno, yiingabha bhariho abhaatu bhaaru bhano bhakunirekya.

<sup>10</sup> Hano Timoteo akuuza kweemwe, mumusuung'aane bhuzomu, okubha yiikare okutama kubha ne ehaho, kwo okubha ewe arakora emirimo gyo Omukuru kyeego enye.

<sup>11</sup> Omuutu wowoosi atamuzeera, nawe mumusakirye ageende kwo omureembe, okubha anagye kukyoora kweenye, kwo okubha enye niramuganya hamwe na abhiikirirya abharikyeetu.

<sup>12</sup> Bhoono, iguru yo omwiikirirya omurikyeetu Apooro, nimwiisasaamiri bhukong'u kubha, yiize oweenyu eyo, hamwe na abhiikirirya abhaandi. Nawe ewe ateendiri kuuza bhoono. Araaza eriibhaga rino akubhona omweeya.

### *Amang'ana go okuraga*

<sup>13</sup> Muteengeeze, mugumire mubhwiikirirya, kweeki mubhe abhakaari na bha amanaga.

<sup>14</sup> Amang'ana geenyu goosi mubhe murakora kwo obhuseegi.

<sup>15</sup> Abhahiiri bhaane, mumenyiri kubha Sitefana hamwe na abhaatu bha yiika waaye, nibho bhaataangiri okumwiikirirya Yeesu Krisito mumugye gwa Akaaya, nabho bhiirusirye

okubhasakirya abhahoreeru. Kweego,  
nirabhiisasaama,

<sup>16</sup> mubhe murabhiigwa abhaatu kya bhayo, na  
abhaandi bhoosi bhano bhakukora emirimo giyo  
hamwe nabho kwo omukya.

<sup>17</sup> Nirazomererwa bhukong'u hano Sitefana,  
Foritunato na Akaiko, bhakaaza hano. Ebho  
bhakaaniha gano niasuuhirwe kwe ekigiriryeye  
kye emwe okutama kubhaho hano.

<sup>18</sup> Bhasaambaarukiryeye ekoro yaane, ne  
eziikoro zyeenyu. Kweego, mubhamenye kisi  
abhaatu kya bhano.

<sup>19</sup> Abhaatu bha mumakanisa mukyaaro kya  
Asia, bharabhakeerya. Akiira na mukaaye  
Prisika, hamwe na abhiikirirya bhano  
bhakwiikumania yiika waabhu, bharabhakeerya  
bhukong'u kwo okugwaatana no Omukuru  
Yeesu.

<sup>20</sup> Abhiikirirya bhoosi bha hano,  
bharabhakeerya. Mubhakeerye abhiikirirya  
bhoosi kwo obhuseegi bhwa Krisito.

<sup>21</sup> Enye Pauro nirakaama obhukeerya bhuno  
kwo okubhoko kwaane omweene.

<sup>22</sup> Omutu wowoosi wuno atakumuseega  
Omukuru Yeesu, yiihimwe. Nawuuze Omukuru  
weetu!

<sup>23</sup> Orubhaango rwo Omukuru Yeesu rubhe  
neemwe.

<sup>24</sup> Nirabhaseega emwe mwoosi, kwo  
okugwaatana na Krisito Yeesu.

**Eriiragano Eriihya**  
**The New Testament in the Zanaki language of**  
**Tanzania: Eriiragano Eriihya**

copyright © Wycliffe Bible Translators, Inc.

Language: (Zanaki)

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-13

---

PDF generated using Haiola and XeLaTeX on 11 Mar 2026 from source files dated 13 May 2025

59cdaa0a-a2d1-5bd9-b56f-be1ffc1ff2aa